

ASO TOFI, 29 IUNI 2023

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasila atu ua amatalia nei Taualumaga a le Fono Aoao Faitulafono.

Ou te faafeiloai atu i le paia o le Palemene i lenei taeao i le afio o lau Afioga i le Tamaitai Palemia, afio lau Afioga i le Sui Palemia, Afioga i Minisita o le Kapaneta ae tainane a outou Afioga i Minisita Lagolago.

I lea talaga atoa, afio lau Afioga i le Taitai o le Itu Agai ma sui usufono mamalu uma o le Palemene. Malo le soifua manuia i lo outou lagi e mama, via le Alii ua tatou toe feofoofoai i Lona agalelei faasoa i lenei taeao fou.

Ou te faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo ua mafai ona auai mai, faamalo le usu, faafetai faamalolosi mai mo le lagolagoina o Taualumaga faaauau a le Palemene.

E fia avea foi lenei avanoa e faafeiloai atu ma faatalofa atu ai i le faafogaga tapuai mai a si o tatou atunu i ona tulaga faalupelupeina, e le gata i Samoa nei ae faapea foi so o se tafa o le lalolagi, e afua mai mauga tetele seia paia fanau iti. Ua faamalo le folau, faamalo le soifua manuia ma le lagi e mama. O le matou tatalo, ia alofagia e le Atua le alofaiva o le atunu i feau ma galuega o lenei aso. Tapuai maia ma le manuia.

I le faaauauina o le tatou galuega i lenei aso, o le tatalo a le Fofoga Fetalai, ia usufono le Agaga o le Atua i o outou finagalo, faaauupega mai le lagi le tofa ma le utaga mo se manuia mo si o tatou atunu. Ia manuia tele le usugafono a lau Afioga i le Tamaitai Palemia ma lau Kapaneta, ia i ai foi Lona agalelei i usugafono uma a sui usufono uma o le tatou Maota.

**TULAFONO TAU FAAOFI O LE FAATATAUINA O TUPE
2023/2024 – felafolafoaiga faaauau i luga o le faitauga faalua
– Aso Fono lona 8**

FOFOGA FETALAI: E tolopo Taualumaga a le Fono Aoao Faitulafono i le aso Fono ananafi, ua maea ona saunoa talifuaitau le Afioga i le Minisita

o Fesootaiga ma Faamatalaga Tekonolosi i mataupu sa laga i saunoaga faalauaitale a Sui Usufono o le Palemene.

Ia, o le avanoa lenei i lau Afioga i le Minisita o Aoga, Taalogia ma Aganuu e te talifuitau ai i mataupu sa laga e sui usufono. Ia ma le agaga faaaloalo lau Afioga i le Minisita.

Afioga Hon SEUULA IOANE (Minisita mo Aoga, Taalogia ma Aganuu): Lau Afioga i le Fofoga o le Fono, faafetai lava mo lou avanoa. Sa tau faanape lava le uluai sa o lenei taeao, e faaeteete foi vaeane lou gutu ma le afi. Sa tau lalafo foi e fofola le falaseu, aua le afifio ma papaaao o mamalu o Tama Faale-Malo, e faigata ta te manao i le ufi ae fefe i le papa.

Lau Afioga i le Fofoga o le Fono, o Samoa o le atunuua ua uma ona tofi, ma e i ai le talitonuga e leai se vave na te toe feliuiaia le paepaeina o le atunuua mai lava i le amataga e oo mai le aso. Ou te faatulou ma ou faaaloalo i ia paepaega ua taatia ai lo tatou atunuua. Peitai, ou te afe ane e faigata le Faavae o le Malo o Samoa. O Samoa e amata mai le Atua, e faaiu i le Atua. O sasae ma sisifo, toga po o matu, o le Atua lava i taimi uma. O le mea lea, ia viia le Atua o le foafoaga, aua na agalelei ma avea Samoa ma ona atunuua e taiala ai ana faiga uma. Faafetai i le Atua.

Lau Afioga i le Fofoga o le Fono, se i ou afe ane ia e faigata le Maota i Tiafau, le usugafono a le atunuua i e ua filifilia mai itumalo e 51 latou te lipoiina le tamaoaiga o Samoa e amata atu i lenei tausaga faaletupe ua fou mai seia oo i lona faaiuga.

Lau Afioga i le Fofoga o le Fono, ou te faatulou ma ou faatalofa atu i lau Afioga, tainane sui usufono mamalu uma o lenei Palemene ua aofia i lenei taeao.

Ou te faatalofa foi i le Afioga i le Tamaitai Palemia, le Kapaneta, Minisita Lagolago ua mafai ona tatou faatasi. E le galo ia te au le tapuaiga a le Susuga i le Failautusi o le Ofisa ma le mamalu o le aufaigaluega. Le vasega o Faatonu o le tatou Malo i Ofisa Sili o Pulega o Ofisa eseese, talofa, talofa lava. O le tapuaiga mai itu e fia o Samoa, talofa, talofa lava.

Lau Afioga i le Fofoga Fatalai, sa i ai se tusitusiga a se tasi alii Siamani, sa ia faamauina nai talatuu ma talafaasolopito o le tatou atunuua. Fai mai lea alii i lana tusitusiga, ou te le o malamalamia i le faalagiga lea a Samoa. A faapea e afe atu se tamalii po o se failauga i se laoa po o se maota, e faapea le faatulima a le tagata lea e nofo mai, afifio maia ma tala mai aao, lo ouluava lea. E tusa lava pe tasi le tagata ae fai mai lava, afifio mai, maliu mai, o lo ouluava lea.

Lau Afioga i le Fofoga o le Fono, i le itulagi a Samoa, e le mafai ona tutoatasi se tasi, e i ai le mea e tau o le tuatagata. O lona uiga, o tagata i ona tua atu. O le mea foi lea e faaeteete ai ona soona lafo le tili ma soona faia se faaupuga, leaga e i ai lou tuatagata. O lou tuatagata lau Afioga, o lou itumalo, o mauli, o agaga, o lo o tutu mai tua ma tapuai mai i le usugafono a Samoa.

O le itumalo o Alataua Sisifo e i ai nuu o Falelima, Neiafu ma Tufutafoe, o affio ai tupu ma ee o le itumalo, o tootoouli o le itumalo, o le tapuaiga a le aufaigaluega paia a le Atua, o e matutua, o tama ma tina matutua, o feagaiga aemaise o tupulaga lalovaoa ma le malosi o le itumalo.

O lou tuatagata, o le Matagaluega o Aoga, o lo o afio ai le Ofisa Sili o Pulega ma lona Ofisa, le mamalu i le Ofisa Tutotonu i Malifa, le paia i asiasi oga, ulu aoga, tamaiti aoga ma faiaoga aemaise o aoga uma.

O le isi ou tuatagata, o lou aiga, o ou matua, o uso ma tuafafine, o lou toalua, o lau fanau, tasi lea ou tuatagata. O le isi ou tuatagata, o au uo ma e matou te masani. O le tuatagata sili ona ou faamulimuli i ai ma ou te mimita i ai, o tuatagata o lau Ekalesia, o lau faifeau, o au faiaoga Aso Sa, o tagata lotu. O tuatagata ia o lou tagata.

Lau Afioga i le Fofoga Fetalai, fai mai se upu a se tasi Sainitisi Siamani o Albert Einstein. Fai mai lana faamuagagana po o lana muafetalaiga, “O laasaga o ananafi e iloa ai asaga o nei. O asaga o nei, e taatia mai ai le ata manino o le lumanai po o a taeao. Yesterday determines your today, your today determines your tomorrow and future.” E faapena le talitonuga o le Ofisa o Aoga, aua foi o lea tatou te talitonu i le tatou talitonuga faa-Kerisiano, tatou te tapuai ma auaua i le Atua, o le Atua o ananafi, o le Atua o nei, o le Atua o taeao. The God of yesterday, the God of today and the God of future.

Lau Afioga i le Fofoga Fetalai, ia, se i ou afe ane e faigata le mataigatila ma le filigaafa o lo o tapuaia ou faiva. Ua agiga i le Maota Fono nei le mataupu lea o le pau maualalo o aoaoga i Samoa. Lau Afioga i le Fofoga Fetalai ma le mamalu o lenei usugafono uma, faafetai tele lava mo le agiga i luga o lenei mataupu, ma matou te momoli atu ma faapea atu, matou te le lalafi i le paolo o le laau, matou te ioeina ma mautinoa le tulaga ua oo i ai aoaoga a si o tatou atunuu. I le amataga o le tausaga pe faalua pe faatolu ona fono Minisita o le Pasefika atoa, se i tau tilotilo po o fea se vaega e tali ai i le faafitauli, aua ua le na o Samoa, o le Pasefika, o le Oceania ma le lalolagi atoa. Ae ai ona o le aafiaga o tatou i le misela i le 2020/2020, 2020/2021 na afe mai ai le Koviti-19, o i ina na faaluafesasi ai taimi aoga o le fanau, taimi galulue o le aufaigaluega ma pau maualalo ai le aoao atu. Peitai, sa faataunu lava fuafuaga a le Matagaluega e fai pea sailiiliga po o le a le level, po o le maualuga po o le maualalo o lo o taatia ai le aoaoina o le fanau. O i ina na atagia mai ai le lumanai e agai i ai.

Lau Afioga i le Fofoga Fetalai, i le amataga o le tausaga nei ua amata ai ona gasolo ma o i tua le Matagaluega e tuutuu laau faa-manuiti i itumalo uma o le atunuu se i soalaupule, avatu, aumai, po o fea lava se mea e ono maua ai se fesoasoani, aua le Matagaluega o Aoga, o alo ma fanau o lumanai manuia o le atunuu. I lena faatalatalanoaga, na maua ai e le Matagaluega o Aoga nisi foi vaega e fesoasoani ai e auau ai ana fuafuaga alualumamao. E le gata i lea, na mafai ona faasoa atu le Ofisa i matua, o Komiti o Aoga, asiasi aoga,

ulu aoga, faiaoga aemaise o le nuu ma le aufagaluega a le Atua e faasoa atu i ai ma faailoa atu i ai moomooga o le Matagaluega o Aoga. Sa matou taliaina foi la latou tuualalo i nisi fuafuaga ua asa ai la matou faasoa.

E le gata i lea lau Afioga i le Fofoga o le Fono, ua i ai nisi polokalame fuafuaina a le Matagaluega e faaoa ai faiaoga ina ia toe timata le upega ma se i toe silasila i le galuega ina ia faaaauau ma lelei fuafuaga uma. O lo o galulue foi le Matagaluega o Aoga e faaaauau pea le faaoaina, le faatamaoaigaina o aoga uma a le tatou atunuu i mea o oloa faaonaponei e fesoasoani ai e tau tuli fuafuaga ua galo ina ia agai pea i luma le naunautaiga mo aoaoga a si o tatou atunuu.

Sa matou faatagisia nuu sa matou afea se i aumai lo latou tauau e ala i le taumafaiga o ni homeworks studies, studies centres i totonu o alaala faga ma nuu taitasi se i tau tuli ai le ai o nai tamaiti ua le mafai ona ausia le faamoe mo lelei. Lau Afioga i le Fofoga Fetalai, e tele ma anoanoai fuafuaga ma polokalame a le Ofisa o Aoga o lo o taumafai e siitia ai le tulaga maualalo o aoaoga o i ai nei.

E i ai nisi vaega sa aafia mai i folasaga a sui usufono o le tatou Fonotele, e pei o malae taalo. Faafetai. E i ai le talitonuga tatou te vaai i le vaaiga lautele. Afai ua faailoa mai se malae taalo o se aoga po o se itumalo, matou te tilotilo foi ina ia tofu saofaga itumalo uma, tamaiti uma, ina ia i ai ni malae taalo e tapena ai taaloga mo alo ma fanau a si o tatou atunuu. O lea lava e i ai faiga faavae, ae taatia mai fanoga ma manaoga i le Matagaluega o Aoga i le itupa o taaloga latou te faasoasoaina ia fuafuaga uma, ae faafetai mo le lalago mai.

Na afea e le finagalo o Vaisigano 2 le aoga faa-T-Vet mo le Alataua Sisifo. Faafetai mo le finagalo. Mo le silafia e lenei mamalu o le usugafono, e ese le taua o le T-Vet.

Afioga Hon Valasi Luapitofanua Toogamaga Tafito Selesel (Minisita mo le Soifua Maloloina): Lau Afioga i le Fofoga Fetalai na o se mea lava e fia faasao.

FOFOGA FETALAI: Ia, malie lau Afioga i le Minisita o Aoga, se i tuu atu le avanoa i le Afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesel: O le sa'o o le itumalo o Vaisigano 1, o au o le 2. Faamolemole lau Afioga i le Minisita.

Afioga Hon SEUULA IOANE: Vaisigano 1. E taua le T-Vet, a o le faalavelave e fai lava si taugata. O lona uiga e tatau ona faavae le aoga a ua mautu ma atoatoa le anofale ina ia aooga foi alo ma fanau a ua sologa lelei ia fuafuaga uma. Peitai, o le manaoga lena o le itumalo o Alataua Sisifo, Falealupo aemaise o nisi nuu tulalata ane, ua fai si mamao tele o le Kolisi i le Itu Asau. Ma e le i leva nei i le 2019 na lavea ai se pasi na i ai nai tamaiti

aoga. Lata mai nei i le 2020, na toe afaina foi le pasi ona o le felauaiga lava o tamaiti. Na ae ai se tofa i lea pito o le itumalo ae a pe a talosagaina se isi Kolisi e vaelua i ai Kolisi. Ia, faafetai i le faigamalo aemaise o le Paeaiga 16 sa avatu se \$300,000 e tapena ai le fanua, ma o la e ua taatia i lagatonu lea faamoemoe lelei, toe lava o se fale. O lo o i ai foi aiaiga ma fuafuaga e faataatia i luma ma sailili seleni ina ia faataunuina le miti a le itumalo.

Lau Afioga i le Fofoga o le Fono, e ese le taua o finagalo i le toe faaleleia o tatou faleaoga. O lo o talosagaina e Faleata nisi aoga i totonu o lona itumalo ona ua toatele tele tamaiti. Ma i le matau atu mai Aleisa Sasae, faasolo mai Tafaigata, Vaitelefou, Vaiteleuta, pitonuu uma na, fai mai le faamaumauga, ua oo atu i le 30,000 tagata o lo o alaala i lea nofoaga. O lona uiga, o se mea o le 20,000 o le tupulaga o lo o tatau ona o i ni aoga. O lona uiga, ua sao le saunoaga a le sui usufono, ua toatele tele tamaiti ae laitiiti aoga. O le taimi nei ua taatia i luga o le Laulau-a-Fono ma ua sauni le Malo o Saina e faalelei le faleaoga i Lepea, o le faleaoga o le Apia Primary, ma Seneterisa i Alafua. A o lo o i ai lava le manaoga e saga faaleleia tele ina ua tele le manaoga ma ua toatele tamaiti, ua tele le feoaiga ua tumu ai le agai mai i le talafatai o Apia. O lea, e matou te faafetai foi i le faamitie sa faia i le tausaga na tea nei i le Paeaiga na tea nei e le Afioga ia Loau, o le latou amataina o le aoga i Tafaigata, lea sa faaigoaina o St Paul. Manaia le faamaite. Pau lava le lagona ona ua faaaoga sela mo pagota e fau ai le aoga.

Lau Afioga i le Fofoga Fetalai, tasi lena mataupu o lo o ua i lumamea o le Matagaluega ma ua talanoaina, ia toe fausia lelei le aoga i Tafaigata i tulaga lelei e tatau ona o o iai se aoaoga ma ni aoga faapea. E le gata mo le toatele o tagata o lo o alaala i le vaiaai lea, ae i ai foi le talitonuga, o se isi lea nofoaga e mamao ese ma le talafatai, e mafai ai ona faasaoina mai tatou mai galulolo ma Tsunami ma tulaga o le suiga o le tau.

Lau Afioga i le Fofoga o le Fono, sa maua se tala a le Matagaluega i le faalavelave na tupu mai Savaii i le amataga o lenei masina, e i ai nai a matou faleaoga na lipoti mai ua aafia i le vai, ua taamilomilo ai le vai. O le matou matau, o nuu ia e i ai a latou ala taligalu i luma sa faia ia mea ona o le manatu e pupuni ai le sau a le sami i tai, ae galoo e i ai le taimi e alu atu ai le vai i uta. O lea la ua tafe atu nei le vai i uta ma ua tali mai e le taligalu po ua taua loa i le taimi lea o le talivai, toe liliu mai loa le vai sue loa le nofoaga e sola ese ai, ua afaina ai faavae o faleaoga, ua afaina ai tamaiti, ua le mafai ona o i se auala lelei i le faleaoga. Ua na o se faamanatu.

Lau Afioga i le Fofoga o le Fono, ou te manatua, o le 1990, 1991 i le taimi o Valelia ma Ofa, na matua afaina ai le itu i sisifo o Savaii e lavea ai nuu nei o Neiafu, Falelima, Tufutafoe, Falealupo, papa, e oo i le Itu Asau atoa. Lau Afioga, e oo mai le taimi lenei, o le tele o aoga sa tu i luga o le talafatai, ua sifi uma i luga i le level maualuga o le eleele. O lona uiga, ua mafai ona faasaoina mai fesuaiga o le tau i lenei taimi. O se faamanatu foi lea a le Matagaluega o Aoga, mo nisi o afioaga o i ai se fuafuaga e fai se faleaoga

fou, se i tagai ane i se nofoaga saogalemu, e le gata e tu mamao ese ma le auala, faasao nai tamaiti mai lologa, aemaise o le fesuiaiga o le tau.

Lau Afioga i le Fofoga o le Fono, ou te faafetai tele i le sui usufono mai Vaimauga 1, e le o mafai lava ona tuua le tata logo pea o lenei sui usufono i tulaga tofi o le Matagaluega o Aoga, ua le gata i asiasi aoga, o pule aoga, o pule lua aemaise o le vasega o faiaoga. O se vaega sili ona taua i le taulogologo ma le toe timata, o lea ua toe amata nei ona toe faatalanoaina nisi a tatou avanoa asiasi aoga ina ia lava le aufaigaluega e tilofiaina galuega a faiaoga, pule aoga, ma lipoti mai i le tatou Ofisa Tutotonu.

O Vaimauga ma Faleata, e tai lua a la asiasi aoga, ua ese mai isi itumalo uma e taitasi. Ia ona o le vaai a le Matagaluega i le toatele o le aufaigaluega, aemaise foi o tamaiti aoga.

O le tele o tatou aoga ua faatotogaina uma i o latou pule lua. Toe 4 lava avanoa sui pule o lo o totoe nei, e 2 i Upolu, 2 i Savaii. Ma o ia foi fuafuaga o lo o taatia pea i le PSC ma ana faataatiaga o ana fuafuaga mo le agai i luma o le faamoemoe. E tele nisi avanoa pule aoga ma o lo o gaoioi pea le Komisi o le PSC e faaoa nei tagata ina ia faaaogaina tatau i avanoa e tuuina mo i latou. E taatia pea le PSC i le latou faatofalaiga aua lava le agai i luma o le Matagaluega o Aoga. Ua tilotilo foi le PSC ma ua faatalanoaina ma le Matagaluega o Aoga i le tulaga o asiasi aoga. Lau Afioga i le Fofoga o le Fono, o aso ia o ou aoga ma ou faiaoga, ta te vaai mai loa ua agai atu le taavale a le asiasi aoga, o i ina lava e amata ai lava lata lesona, aua e le tatau ona maua atu ita o ota faatalapelo po o ota tutu i se isi mea. Ae ina ua le toe faatumulia le vaega lea, e pei ua i ai se faatalale. O le ala lea ua matua faatauaina ai le tapena o asiasi aoga i le latou matafaioi taua.

O le tatou OGG po o le One Government Grant, e i ai lo matou talitonuga, o le faatulafonoina ma le tufaina e i lalo o le Matagaluega o Aoga. A o le tupe ma fuafuaga alualu tetele, e i lalo o le Malo. E faigata tele la le tele o nisi o manaoga mai nuu ma aoga agai i le OGG, e i ai lava foi vaega seiloga e ioe le Malo ona faapena lea ona faataunuina. A o fuafuaga uma ua uma ona faataatia ona aulape ma mea e ui i ai ana fuafuaga. Ma e matou te manaomia foi fautuaga e mafai ai ona faatonutonu malie ma maua avanoa lenei e faasoai lenei vaega. Faafetai tele i lau Afioga i le Minisita mo le vaegatupe lenei.

O le tatou connectivity, o lea na outou faafofoga o saunoa le Minisita, ua toeitiiti lava soo a tatou aoga, ae faafetai. Ou te manatua pea le saunoaga a le Tamaitai Palemia pe a matou o e asiasi i le connectivity, po o le a lava le saoasaoa o le alu a le malosi o faasalalauga, ae a le oo i tamaiti aoga, e leai ma se aoga o ia mea uma. O lona uiga, a faapea foi o faafofoga mai le aiga ulu aoga, o le feau lena mo tatou, tapena ia mautu mea e fai ai le aoga a tamaiti aoga, o lena ua i o outou aao le connectivity e faataunu ai mea uma. Ua agalelei atu foi le Matagaluega e tufa atu nisi alagaoa e fesoasoani i la outou galuega.

Ou te faafetai tele i lau Afioga i le Minisita o le tatou \$1 miliona. Ua agiga i lenei malaefono se faafetai a se tasi sui usufono ona o se faatofalaiga i le latou lava fono faavae e faavagavaga sina vaegatupe e fesoasoani ai i pili o aoga. Faafetai, faafetai tele lava. Ou te manatu foi, e le na o le pau lea o le itumalo ua ae ai se tofa e faapena foi i lou itumalo. Ua matou manatu foi o se isi lea auala e faasoa mo le atinae o le tamaoaiga o le atunu o le tapenaina o alo ma fanau aoga. Faafetai tele mo le Vaa o Fonoti mo lenei tupe telē ua afea mo fanau aoga.

O ananafi sa umusa ai le faleaoga i Manono Tai, na afea ai se saunoaga a le Taitaifono po o le Afioga i le Sui Fofoga Fetalai sa latou foi fuafuaga e faataatia se seleni o le latou Fono Faavae e fausia ai se tane vai fou e ao ai le suavai mama aua le faaaogaina e alo ma fanau. Ou te manatu ua lava ia Itumalo e fai ma faataitaiga a ua tutusa uma le lagona o Itumalo taitoatasia ua i ai se vaega o lenei miliona tala mo a latou fono faavae mo le tapenaina o Aoga. Ua le gata i Aoga Faataitai, Tulagalua aemaise o le tatou Iunivesite.

Lau Afioga i le Fofoga o le Fono, sa i ai se manaoga po o afea e tuueseese ai le Matagaluega o Aoga ma Taaloga. Lau afioga o manatu na sa fuafua mamao e fua i le tau o lea taimi ma lea taimi. E pei lava ona ou fai atu o ananafi e tapena nei, o nei e tapena ai taeao. E leai se mea e faafuaseia e tapena ma soalaupule mea uma. I lena taimi sa sauniuni ma tapenapena faapena e tuueseese peitai e fua foi i aga a le Malo i ana tamaoaiga ma le faatupeina aua e le taugofie lenei faamoemoe. Ae i ai lo matou talitonuga e faataatia pea i lumamea se taimi faataunu ia faamoemoega a o le taimi lenei oloo sologa lelei pea le vaavaalua o aoaoga ma taaloga ina ia mafai ai ona valatalata foi le atinaeina o taaloga i lalo o le pulega a tamaiti aoga.

Lau afioga i le Fofoga Fetalai, e i ai le vaega e fia faaleo i le Afioga i le Minisita o Tupe i le matou paketi na tuuina atu, sa i ai le \$1.9 miliona sa faaagaga mo le vaega foi lea e tau o le Inclusive Education, peitai, ua matou vaai atu ua le atagia mai luga o le tala o le seleni. Ia e pule lava Sitafuni i le la o lona vaa. Ae na ona matou faaoloolomaau e matua manaomia le seleni lea, aua e iai foi le matou faasoa i nai aoga o lo o aoaoina ai nai alo ma fanau laia e pei o le, Loto Taumafai, Senese ma nisi Aoaoaga o lo o i ai nai alo ia e moomia le faasoa i ai o se seleni.

O le mataupu tuga, o le mataupu lava i le le lava o Faiaoga. Lau Afioga i le Fofoga Fetalai e mafai foi ona ou faaupuina lenei mataupu o le mataupu o le lalolagi atoa, auā foi e le'o na o Samoa e le na'o le Pasefika, e le na o le Oceania ae ua oo i le lalolagi atoa. Ae ou te faafetai foi auā ina ua afea tatou i le Koviti ma le Misela na faafuasei ai lava ona oo mai i totonu ma faaofi mai le tekonomosi e fesoasoani ina ua tapunia a tatou aoaoga. Ae ua avea lea ma auala ua faamanuiaina ai le Matagaluega o Aoga ua vave ai ona oso i luga le aoaoaina o Faiaoga ma aumai i totonu o Aoga masini faaonoponei o lea ua tatou agai ai, e fesoasoani tele i le faataunuina o lea foi miti faitaga o le toaitiiti o Faiaoga

Lau Afioga i le Fofoga o le Fono, e i ai nisi faiaoga ua o ese ona o galuega faavaitaimi. E i ai nisi faiaoga ua faamavae ua mananao e sui a latou galuega ia pe ua malaga foi e sailimanua i atunu i fafo, ae ou te iloa lava o le vaega sili lea ona fiafia i ai faiaoga e toe liliu iai la latou matafaioi o le o e fai ma Faifeau o le Kolisi o Moamoa, Kolisi o Piula, Kolisi o Malua ma isi lava mau Kolisi Kerisiano eseese ua tumu i faiaoga. Fai mai le latou mau o o la e tele ai le mamoe e tatau ona o e tausi, a o le matou foi augani o le tele ia o mamoe o lo o i totolu o lenei lotoa o lo o manaomia ni leoleo mamoe.

Lau afioga i le Fofoga o le Fono ona ou oo mai lea i le tatou Connectivity e pei foi ona afea muamua. O lea ua lelei toe lava ona faataunuu ma faaleleia mea uma, aoaoaina faiaoga ina ia latou iloa faaola latou iloa fesootai ma tamaiti aoga ina ia taunu ma le manuia lea faamoemoe.

O le taulata i le faaiuga o le tautalaga, lau afioga i le Fofoga Fetalai, e momoli le faafetai tele i sui usufono uma o lenei Fonotaga i lo latou finagalo ua afea ai le Matagaluega o Aoga. Ae i ai lou talitonuga i le upu foi lea sa saunoa iai le Taitai o Amerika i le 1961, a o logologoa le tau faafilemuina o atunu tetele o le lalolagi sa ia manatu ai e fai se faiga a Amerika e o ai ona tagatanuu e momoli le filemu. Fai mai e tala a lea Peresetene “Amerika soia tou te fesili i le Malo poo lea se mea e fai mo outou, ae fesili outou poo le a se mea tou te faia mo le Malo”. O ina na afua mai ai na amata le vaega lea ua taua nei o Peace Corps i totolu o le lalolagi.

Lau Afioga i le Fofoga Fetalai i le masina lea na tea nei o Mati, Aperila, Me sa matou feiloai ai ma le toafitu o Peace Corps mai Amerika ua fesoasoani mai i tatou aoga i Samoa nei. Ua taatia foi i luga o le Laulau-a-Fono ma le faatalatalanoaga ma le Ofisa o Pisikoa (Peace Corps Corporation) o le masina o Iulai e taunu mai le isi 30 o Pisikoa e omai e fesoasoni mai i le Matagaluega o Aoga, ona o le taumafaiga lava ia lelei le literacy, faitautusi ma le tusitusi. O se avanoa lelei foi lea ou te faafetai atu ai i se tasi o Itumalo i le Motu Tele i Salafai ina ua faia e latou se faamaite faapea o Aso Lulu uma ma Aso Faraile e le toe tautalagia ai le Gagana Samoa i totolu o le lotoa a le Aoga o le Itu o Tane. Ua amata ona latou faia se faiga fou e fesoasoani mo faitautusi ma le tautala i le gagana Igilisi, ae pau le lave lau Afioga ua lipotia mai foi, o aso ia ua sili ona le toatele ai ni tamaiti e o atu i le aoga. Ae faafetai mo le faamaite atonu e le onomea mo se isi Itumalo ae fetaui lelei mo se isi Itumalo.

Lau Afioga i le Fofoga Fetalai, e tele upu e masani saunoa i ai lenei Maota, e masani ona ou faalogo i le upu lea, o le ua na iloa le mea lelei e tatau ona fai ae le faia, o le agasala lea. Lau afioga o le tele o Sui o le nei Maota ua tatou iloa faaletonu ma mea e tatau ona faaleleia. O lona uiga e tatau ona solomua foi ia tatou e fai ma faataitaiga. O lo’u uso lea ua le nofo mai i i, le Afioga i le Minisita na musumusu mai ia te au o la ua fai lana vasega i le latou Kolisi i le taeao po lava faatoa usu mai lea e faigaluega. O i ina foi na oso ai ia ou moge ma ou faapea, “ae ua tatau foi la ona fai sau vasega”. A

ou oo i Savaii i le Aso Toonai ona maua ai lea o nai tamaiti pe toalima pe toaono ma fai i ai sina fesoasoani, amata mea ina ia fesoasoani mo alo ma fanau.

O le a faauma se tautalaga lau Afioga i le Fofoga Fatalai, o le agaga o le faafetai...

Afioga Sulamanaia Fetaiai Tauiliili Tuivasa (Vaimauga 1): Lau afioga i le Fofoga Fatalai, e matau atu o le a, pe maua se avanoa o lenei Itumalo.

FOFOGA FETALAI: Ia malie lau Afioga i le Minisita se i tuu atu le avanoa i le sui mamalu mai Vaimauga Nu 1.

Afioga Sulamanaia Fetaiai Tauiliili Tuivasa: Ioe, ae le i faia se faauilavea e tusa foi ma le Tulafono Tumau, e momoli atu le agaga o le faafetai i lenei taeao i le aulelei foi ma le matagofie o lenei Maota i laei, e momoli atu ai le agaga faafetai ona o le faatauaina foi o lenei aso mo le Sauaina o Tina ma Tamaitai. Ae leaga sa ou lauga ai i le Minisita ma ana tulaga foi e pei o le a matau atu o le a lamalama faaiu foi, ae momoli atu le agaga o le faafetai lau Afioga i le Minisita sa taua ai totogi o Ulu Aoga, e pei o lea e matau atu ona o le naunautaiga foi lea ia mafai ona pito i luga le Ulu faatoa pito ifo ai i lalo le Pule Aoga.

Lona lua sa ou tatalo atu ai o le tulaga foi lea o totogi o Pule Aoga poo le a se finagalo ona o lea e matau e base le totogi o le Ulu Aoga i le tele o le lola a le aoga. O le popolega lea e i ai lau Afioga ia e le faapea se i tulou le matou, i Apia i Malifa e fia omai uma lava Pule Aoga e fia pule i Malifa ona o le a, e tele le totogi aua e tele le total la e iai, ae o le manatu sa avatu o le Pule Aoga a o le Pule Aoga, ae pe le mafai ona fai se scale o Pule Aoga uma a o pule aoga pe toalima tua i Fagaloa e laitiiti le total o tamaiti e pei e faapena se agaga.

Lona lua sa matau atu foi, o le manaia ia o le saunoaga a le Minisita lenei e faafetai a i lena Faigamalo aua e sa'o tagata laua te galulue i totonu, faatoa faalogo a lea o le Sui o Vaimauga 2 i upu ia "tuatagata", o le manaia ia o lau folasaga ae e pei e matau atu o lena e galo ia te oe lau tuatagata lena e i tua o oe o lau Minisita Lagolago, o lea e galo ia te oe au tuatagata lea amuia oe e 2 lua sui i totonu o le Palemene, o lou tuafafine faipule, a o isi faipule e taitasi matou.

O le mea mulimuli lau Afioga e matau atu ma le alofa lenei Sui...

FOFOGA FETALAI: Ia o lea ua maua atu.

Afioga Sulamanaia Fetaiai Tauiliili Tuivasa: I le afioga i le Minisita, o lea ua toe tatalo i le Minisita o Tupe ua toe aveese se isi vaega ia ae e pei e tau faanoanoa ai foi lea talofa e ese le lagolagoina e lenei Itumalo i le

Minisita o Aoga, ae mataulia o le tala a lenei o le Tupe o le tala a latou, ae talofa e, ia tatalo mai pe i ai se tupe i lenei itu i le Taitai o le Itu Agai, se i avatu e faatumu ai le pu lena ua aveese. E pei o le lagona lena lau Afioga ua tagisa mai a si Minisita i totonusi o lenei Maota, e pei e tau faapena se agaga. Manuia lau Afioga i le Fofoga Fetalai aemaise le Minisita.

FOFOGA FETALAI: Ia mo le faasaoina o le taimi o lau Afioga i le Minisita se i tulai mai le sui usufono mo Sagaga Nu 2.

Susuga Maulolo Tavita Amosa (Sagaga 2): Faafetai mo le avanoa, faafetai mo le folasaga matagofie a lau Afioga i le Minisita o Aoga. Ae talu ai sa ou taua i lau lauga faalauaitele le tulaga o le Iunivesite, e mafua ona o lenei Itumalo e feoloolo foi tamaiti ia e fesoasoani ai i pili o le Iunivesite, lea sa ou taua ai e matau atu ua iai se faaititiga o le fesoasoani i le vaegatupe o lenei tausaga i le Iunivesite. E lua la mea sa ou folasia sa ou popole iai nei mea ua uma ane ua toe sii foi pili o le Iunivesite a o la ua taugata, lona lua nei compromise le standard o Aoga o polokalame o le Iunivesite, aemaise la ia e leai se isi mea e tua i ai e toe maua nisi faiaoga aua o na e le lava faiaoga vagana lava polokalame a le Iunivesite ma le faaaloalo lava.

FOFOGA FETALAI: Ia se i tulai mai lau Afioga i le Minisita.

Afioga Hon SEUULA IOANE: Faafetai i lau Afioga. Faafetai Vaimauga 2 ua toe famanatu mai isi tuatagata ia ua galo. E pei lava ona fai atu e leai lava se isi e tu faamauga ma tutoatasi o tatou uma lava e i ai o tatou tagata i o tatou tua.

Ae o le faataatiaga o totogi o Pule Aoga ma le faasologa o lo o i ai lava le PSC o le latou lea matafaioi latou te faavasegaina ia tulaga. O le ala foi lea o le le afea i se faamatalaga, o lena ua tuu atu ia o lo o i ai le soalaupulega i le Susuga i le Taitaifono ma le afioga i le aufono a le PSC latou te faatulagaina ia fuafuaga ona o faataatiaga ua mulimulitai i ai le tatou Malo. Ae faafetai Sagaga e sa'o oe ua misi ia te au lau mataupu sa tuuina mai, ma ua uma ona talanoaina ma le Iunivesite o le fuafuaga ua latou ioeina le pau o le latou tupe e alu atu i totonusi i le Tala o le Tupe o lenei Tausaga Faalelape. Peitai fai mai latou ona o la latou fuafuaga alualumamao e i ai foi isi siitaga ia latou tapenapenaga i autafa o le latou Tala lea e fua i latou tupe lea ua maua. Fai mai le Afioga i Pule Sili o le Iunivesite e mafai lava ona lola i luma la latou tapenaga i le taimi nei, i le isi 4 – 6 masina e aunoa ma le afaina fua o pili aoga o tamaiti aemaise foi o le mataupu aoaoaina. O se tulaga lelei foi lea ia ma le matau atu ma le tali mai o le tatou Iunivesite, ae faafetai foi ua lagalaga foi finagalo ma ua ae se tofa ona o le faamanatu mai.

Lau Afioga i le Fofoga o le Fono e pei ua ou tautala tele i le PSC ou te faafetai atu ai foi i le Afioga i le Tamaitai Palemia ma lana Matagaluega i le

Taitaifono ma le aufono a le PSC, aua o latou lava ia latou te tapenaina tulaga tofi e pei ona afea e le Maota nei, ona i ai lea o le talitonuga fili i le tai se tautai agavaa aua le folaua o fai nei.

Lau Afioga i le Minisita o Lafoga ma Tupe Maua, e faafetai atu foi le Matagaluega o Aoga ona o le tele o pusa oloa lea e aumai mai i fafo, o pusa e faameaalofa mai e isi Kamupani ma isi Aoga i atunu mamao matou te tusi atu lava i lau Afioga ma lou Ofisa se i aumai sina tau faamama. Ma e oo mai i le taimi lenei o lo o agalelei pea le vaega lea e faamama le tiute o le tau o pusa oloa o lo o aumai ai tusi aoga, nofoa, laulau ia ma nisi vaega mo aoaoga a le fanau.

Faafetai i lau Afioga i le Minisita o Faatoaga. Fai mai le talitonuga faapasefika i le mea lea e tau o le Childhood Development e amata le lelei o le olaga aoaoina o le tamaiti i le soifua maloloina. Our healthy body leads to a healthy mind, o le lelei o taumafa o fualaauaina, fualaau suamalie, o meaano a lelei ona tapenaina mo alo ma fanau o le lelei foi lea o mafaufauga o nai tamaiti.

Faafetai i lau Afioga i le Minisita o le LTA, o le tele o auala o le lautetele o auala o le faigofie i tamaiti ona feoai i luga o aula ma oo atu i le aoga. Faafetai mo le suavai aemaise le eletise sa iai se asiasiga na alu atu talu ai nei e o atu e asi Aoga ae faimai o la e pe le eletise, ia masalo ua galo ona totogi le eletise a o lea e agai atu le paoa i le Aoga faafetai.

Faafetai Leatinuu, faafetai i le tatou Matagaluega lea e laua nei o tatou tagta i atunu mamao, ou te le talanoa i le negatives sides o mau mea e tutupu mai ae ou te talanoa au i faamanuiaga. Ua maua ato aoga a tamaiti, ua maua faamalu ua maua penitala ma vase. Aisea? Ua tele tagata ua lafo mai seleni e fesoasoani i aoga malo.

Faafetai i le Soifua Maloloina. O le Soifua Maloloina ma Aoga o se faaipoipoga ua leva faafetai o lo o faaauau pea ona o atu fomai e siaki tamaiti aoga ia siaki atu ai foi ma faiaoga, malo le galulue faafetai.

Lau Afioga i le Minisita o Leoleo e fia momoli atu foi le agaga o le faafetai i le auaunaga a Leoleo i le tausiga o le soifua maloloina ia ma le saogalemu lautele. E i ai le talitonuga e leo mafai lava ona aveesea lea tiute taua ia famanuia tele le Atua. Ona o lau Afioga lea e i ai le vaega lea o faigapalota, ou te augani atu faamolemole se i toe faasao ane lava tatou pasene o tatou faigapalota leaga olo o aafia ai aoga i le suega o le pasene e faataunu ai fuafuaga taua

Lau Afioga i le Minisita o Tupe faafetai mo le Paketi ua aumai mo le Matagaluega o Aoga e \$100+ miliona. E i ai le talitonuga o le a faaaogatatau ina ia anoa lou faamoemoe ia ae alofa ane i le tatalo ua tuuina atu.

Ia lau Afioga Leota faafetai mo le tatou miliona. O le popolega lea sa i le Iunivesite i ana pili tai \$1000 ma le tai \$2000+ toeititi lava uma le Semesters e le i totogia pili ae o se taimi muamua lenei ua aumai ai se Lipoti ua aveese lea fatu sa mamafa i finagalo o le Administration ua mafai ona auai atu

Itumalo taitasi ma latou faapea atu o le a latou totogia o tamaiti aoga o latou Itumalo. Malo. Ia maua pea lou malosi ma saga faaopoopo ia tele nisi miliona

Lau Susuga Matamua o oe le isi tagata lea e te avea soo faiaoga i leoleo pe a faapea ma faasala pe a faasaunoa i tamaiti. Malie lau Afioga tuumama lau sausau aua le faa-falepuipuia faiaoga o lea e sioki faiaoga o le tatou atunu.

O lo o faaaauau pea ona lelei le tatou Connectivity lau afioga ae o le tatalo sailiili pea nisi auala e faaaopopo ai pea mo le agai i luma.

Lau Afioga i le Minsita o Punaoa Faalenatura tasi lea vaega o lo o feoai ai tamaiti aoga ua le gata o le Tausaga 12 ma le Tausaga 13 o le fai o latou Research poo sailiiliga ae faafetai o loo maua ia le avanoa mai oa mai punaoa faalenatura aemaise foi o le siosiomaga mo le agai i luma.

Lau Afioga i le Fofoga o le Fono ona afe mai lea i fanua o se faamatalaga faafetai tele mo le avanoa faafetai le tapuai ia agalelei le Atua ma i ai lona alofa tunoa e taitaiina ai lenei Fonotaga seia oo ina faaiuina. Soifua ma ia manuia.

FOFOGA FETALAI: Ua faamalo saunoa i lau Afioga i le Minisita malo foi le faasoa aemaise foi o le silasila mamao a le Matagaluega aua lava alo ma fanau a le atunu mo aoaoga mo lo latou lumanai, aemaise lava ia e faasa'o foi lau afioga i le Minisita e faataua alofa ma fanau i lo latou aoaoina aua o i ina o lo o i ai le lumanai o soo se atunu, o le mea lea malo faafetai mo faiga faavae aemaise foi o fuafuaga mamao o le Matagaluega o Aoga. O le mea lea malo faafetai.

O le mea lea ua oo mai le tatou faasologa i le Minisita o Faamasinoga Honorable Matamua.

Tofa Hon MATAMUA SEUMANU VASATI SILI PULUFANA (Minisita mo Faamasinoga ma Pulega Tau Faamasinoga): Ou te faafetai atu mo lou avanoa. Ou te faatalofa atu i le Fofoga o le Fono ma le mamalu o sui usufono uma o le Fono Aoao Faitulafono o Samoa, afio lau Afioga i le Palemia, Afioga i le Sui Palemia, Afioga i Minisita o le Kapaneta faapea Minisita Lagolago. Malo afua ailao ua maua i le alofa ma le agalelei o le Atua.

Afio foi lau Afioga i le Taitai o le Itu Agai ma lena Itu o le Maota, malo le soifua. E faapea lau Susuga i le Failautusi ma le aufaigaluega o le Ofisa o le Fono Aoao Faitulafono.

Ou te faatalofa atu foi i le tapuaiga mamalu a Le Ao o le Malo ma lau Masiofo, lau Afioga i le Sui Tofia ma lou Faletua, lau Afioga i le Faamasino Sili, le Peresetene ma le Vasega o Faamasinoga.

E faatalofa atu i Faauluuluga o Eklesia Kerisiano i Samoa, faapea le aufaigaluega totofi a le Atua o lo o faanonomanu aua se manuia o Samoa. Ou te faatalofa atu foi i lau Afioga i le Peresetene o le Koneferenisi a le

Ekalesia Metotisi i Samoa ma atunuu i fafo. Susu lau Susuga i le Fofoga o le Koneferenisi faapea lau Susuga i le Teuoloa a le Ekalesia. Ou te faatalofa atu foi i le Susuga i le Peresetene Sili o le Koneferenisi a le Au-uso Fealofani faapea le Failautusi, afifio Taitai o faa-Sinoti a le Ekalesia ma Saofaiga mamalu o Tina ma Tama Manumalo i le paia o le aufaigaluega galulue. I le afifio o Komiti Tumau o le mamalu o sui usufono filifilia a le Ekalesia Metotisi mo lenei tausaga 2023.

Ou te faatulou i le paia i le Usoga a Pule ma Tumua Ituau ma Alataua, Aiga i le Tai ma le Vaa o Fonoti, Tama ma o latou Aiga, Aiga ma o latou Tama, tulou, tolouna lava.

Ou te faatulou foi i le paia ia Sua ma Vaifanua, Fofo ma Aitulagi, Saole ma Saleaaumua ma le Launiu na Saelua, ma Faatui o le Motu, Tama a le Manuatele ma Tootoo o le Faleula, tulou. O paia na o Samoa mai le taisamasama seia paia le fafa o Saualii o le a nuunuu atu faatini o tausala aua o paia mai le vavau e oo lava i le faavavau.

E faatalofa faapitoa atu foi i le paia o si ou Itumalo o Faasaleleaga Nu 1, Salelologa ma Tafua, i le nofo a faafeagaiga faapea le afifio o Tapau ma Salelologa, tainane le afifio o Taifaasisina ma alala matuatala ma le mamalu o Toiloto. Faafetai le tatalo malo le tapuai.

Lau Afioga i le Fofoga i le Fetralai faafetai mo le avanoa e tuuina atu ai se tali i mataupu na afea ai le Matagaluega o Faamasinoga ma Mataupu Tau Faamasinoga faapea le Komisi o le Toefuataiga o Tulafono o Samoa (Samoa Law Reform Commission) i saunoaga a sui usufono mamalu o le Maota.

Muamua, o le mataupu sa saunoa i ai le sui mamalu o Vaimauga tai tutusa lava ma se tasi o manatu na saunoa i ai le sui mamalu o Sagaga 4 e faatatau lea i taimi faatapulaa (timeframe) e tatau ai ona fofogaina le faaiuga a le Faamasinoga o Soligatulafono (Criminal Court) ma Faamasinoga tau le va ma tagata (Civil Court) lea e i ai le Faamasinoga o Talosaga ma le Faamasinoga Maualuga ma le Famasinoga Faa-Itumalo ma le Faamasinoga Fesoasoani. Ma aumai ai se tulaga faapea ua umi tele o faatali nisi o faaiuga o Faamasinoga, e le o aafia ai Faamasinoga o Fanua ma Suafa ona o lea lava ua manino le Tulafono o Fanua ma Suafa i le taimi faatapulaa e 3 masina e tatau ai ona fofogaina se faaiuga o le Faamasinoga o Fanua ma Suafa mai le aso e maea ai lana iloiloina i se mataupu.

Mo le silafia e Sui mamalu le o iai se Tulafono o faatulafonoina ai le taimi faatapulaa e tatau ai ona fofogaina se faaiuga o se mataupu i le Faamasinoga o Solitulafono ma le Faamasinoga i le va o tagata. E iu foi lava i teuteuga o le Tulafono Faavae 2020 ma le Tulafono o le Faamasinoga 2020 e le i aofia ai lea mataupu, peitai o lo o iai lava taiala o lo o faatonu folau ai le faatinoga ma mataitu ai e le Faamasoni Sili ma Faamasoni o le Faamasinoga Maualuga, ma Faamasinoga Faaitumalo lana lea matafaioi patino. E fai fuafua foi nei naunau i le vave ona topelau lea o le galuega ae le maua ai le

atoatoa o le sailiiliga a se Faamasino i vaega uma sa suesueina i le iloiloga o lea mataupu a o le i tuuina mai se faaiuga talafeagai.

O le agaga o le manatu o lo o iai lava i le Faamasino Sili ma afioga i Faamasino le tofa fetuutuunai faapea taiala e faatonutonu folau ai le faatinoga o le latou galuega aemaise le tuuina mai o ana faaiuga i totonu o le taimi talafeagai.

O se tasi o mataupu sa faapea ona saunoa iai le sui mamalu o Sagaga 4 o le tulaga lea ia i latou o loo molia mai e Leoleo ona loka lea ae toe tatala atu i tua. O le tulaga lava i le tatala ma le taofia o se tagata ua molia mai i soligatulafono o lo o iai le malosiaga faaletulafono o le Faamasinoga ma le Resitala. E i ai foi aiaiga ma tuutuuga e taialaina ai tatalaina atu i tua o i latou e molia mai i ni soligatulafono. E fetuunai le Mataglauega o Leoleo ma le Resitala pe tatau ona tatala i tua pe leai e faatalitali ai le Faamasinoga. Ma e fua foi le faaiuga a le Resitala i se finagalo o le Mataglauega o Leoleo faatasai ai ma le ogaoga o le soligatulafono e pei ona molia mai ai, atoa ai ma aafiaga o i latou sa aafia, victims, i se soligatulafono. E ao foi la ona silafia, e le faapea e molia mai loa se tagata ona otometi lea ona faamaonia lana soligatulafono, innocent until proven guilty. Ma e le mafai ona faamaonia se soligatulafono a se tagata ua molia mai, seiavagana ai ua fai i ai se faaiuga a le Faamasinoga. Afai foi e tatala i tua se tagata ua molia mai, e fai tuutuuga i le tatalaina i tua, e tai pei o le saini i le Ofisa o Leoleo, taofia o le malaga i fafo, taofia ona toe fesoottai se tagata sa aafia i se soligatulafono, ia ma nisi lava tuutuuga talafeagai e tatau ona fai.

O le mataupu sa saunoa i ai le sui usufono mamalu o le itumalo o Faleata 4 e uiga i se headline i se nusipepa ma tulaga i Tulafono e 3. E le na ma le laina, o Tulafono nei a le Faamasinoga o Fanua ma Suafa, e aafia uma ai tagata Samoa, tagata Samoa o lo o alaala i Samoa nei faapea tagata Samoa o lo o alaala i atunu e mamao, ona o faasinomaga i fanua faaleaganuu ma suafa matai. O le taimi nei ou te fia tau atu i le sui usufono mamalu, e tumau pea le anavatau. O le anavatau lena ina ia toe silasila totoa i le faatinoina o tatou Tulafono, aua le malupuipua e le gata i lenei Mataglauega ae faapea foi i ona tagata lautele. O le Tulafono LTRA 2008 po o le Tulafono o le Faamauina o Pule o Fanua 2008, o le Tulafono lea o lo o nafa ma le Mataglauega o Punaoa Faalenatura ma le Siosiomaga, ma e fitoitonu ma le Afioga i le Minisita o lea Mataglauega.

E momoli atu le faafetai tele i lau Afioga mo lau folasaga ua manino mai ai e oo mai le taimi nei e leai se fanua faaleaganuu o aafia i lenei Tulafono, seiavagana le Tulafono o le Lisiina ma le Laiseneina o Fanua Faaleaganuu. O le Tulafono lea e aiaia ai lisi i luga o se fanua faaleaganuu ma e fitoitonu foi i le Mataglauega o Punaoa Faalenatura ma le Siosiomaga.

O mataupu tau lisi i fanua faaleaganuu, e muamua ona faasalalau e lea Mataglauega i le Savali. Afai e i ai se faalavelave, ona faatoai atu lea i le Faamasinoga o Fanua ma Suafa. O le talosaga faalavelave la lea i se

faasalalauga o se fanua faaleaganuu ua fuafua e lisi, e iloiloina e le Faamsinoga o Fanua ma Suafa. E agai sao lava la le iloiloga a le Faamsinoga o Fanua ma Suafa i le fanua faaleaganuu lea sa faasalalaauina ai le lisi, pe tatau ona teena le lisi pe faamaonia, lea sa faasalalaau i luga o le fanua faaleaganuu. Afai loa ua talia se faasalalauga o se lisi i se fanua faaleaganuu, ona tuuina mai loa lea i le Matagaluega o le Siosiomaga, o i latou tonu e nafa ma le mataupu tau lisi. E le tagofia foi la e le Faamsinoga o Fanua ma Suafa mataupu tau lisi, ona e leai so latou malosiaga e na o le fanua faaleaganuu e agai i ai so latou finagalo. Ae seiavagana ai le Faamsinoga Maualuga e faatoai i ai nisi mataupu e toe lagalaga mai i le lisi.

O le pitolaau foi a lenei Matagaluega o lo o i le Tulafono o Fanua ma Suafa, o le faasee atu lea o ana faaiuga a le Faamsinoga o Fanua ma Suafa i mataupu faatatau i le pule po o le tulaga o so o se fanua faaleaganuu pe afai e talosagaina mai e le Resitala o Fanua a le Matagaluega o Punaoa Faalenatura ma le Siosiomaga.

Ona ou oo atu lea i le mataupu sa laga mai e le sui usufono mamalu mai Aiga i le Tai e faatatau lea i faaiuga a le Faamsinoga Maualuga, lea ua taua o Court Grants, i fanua faaleaganuu a Samoa. E foliga mai e feteenai le umiaina o fanua faaleaganuu lea i le Mataupu 102 o le Tulafono Faavae. Mo le silafia, o Court Grants, o faaiuga ia a le Faamsinoga Maualuga, lea sa fai i le tele foi o fanua faaleaganuu ae le i faatulaiina mai le tatou Tulafono Faavae i le 1960. O le Tulafono Faavae lena lea ua i ai le puipuiga o fanua faaleaganuu. E leai foi se mea e toe mafai ona faia i faaiuga nei ua taua o le Court Grants, seiavagana ai se iloiloga faa-Faamsinoga, lea ua taua o le Judicial Review ona faatoa mafai lea ona toe tagofia faaiuga nei. E oo foi i se suiga i ni Tulafono, e i ai le faaeteetega i le tulaga lea o le aiaina e se Tulafono o mataupu ua uma ona fai i ai se faaiuga a le Faamsinoga.

O le tali atu lea e tusa o le mataupu sa saunoa i ai le sui usufono mamalu mai Aiga i le Tai.

FOFOGA FETALAI: Malie lau Afioga i le Minisita se i tuu atu le avanoa i le Minisita se i tuu atu le avanoa i le sui usufono mo Aiga i le Tai lea sa lagalaga le mataupu lea.

Afioga Auuapau Mulipola Aloitafua Mulipola (Aiga i le Tai): Lau Afioga i le Fofoga Fetalai, e leai se agaga ia te au faalavelave i le malu o le folasaga a le Afioga i le Tamaitai Minisita. E momoli atu le faafetai. Ae talu ai ona o le mataupu lea sa oo i ai le leo o lenei itumalo, o le mataupu e afua mai le tausaga 1893. E leai se agaga i lou sui usufono ou te luiina faaiuga a le Faamsinoga, e matua faamamalu i ai le sui usufono lenei. Pau lava o lea, o le agaga autu sa ou lagaina ai, pe o i ai se mea o i ai le va o le Faavae i le 102 ma le vaitaimi lea o pulega faa-kolone a le tatou atunu le Colonialism.

Aua o le upu lea e faataua e lou sui usufono i le Vaega 102, e le faaliliueseina atu eleele tau le aganuu. A o le mataupu lea, pei o le upu autu lava lea ou te tautu, o le taimi o fai faaiuga a outou tuaa ma ni o matou matua, o le gift. A o aiaiga foi o lea foai pei ona ou talanoaina, o lea e ia au le foai ma tuutuuga o le foai. Ae afai la e ave le eleele i se tulaga faameaalofa, po o i ai la i lalo o le Vaega 102 lea o le Tulafono. Aua o lo o i ai le faaupuga faa-Samoa o le 102, i se isi lava faiga e mai le eleele tau le aganuu po o se isi itu e tau ai i eleele tau le aganuu, i se auala o le faatau atu, lisi, laisene, mokesi po o se tasi lava faiga. O lea la ou te mautinoa, o lo o i ai le LTRA i le lisiina o eleele, e le vasaga la, o lea e manino la, o lea ua faamalieina ai le Tulafono lea leaga o lea ua i ai le LTRA 2008.

A o le tulaga o le eleele ua faameaalofa ae i ai ona papuipui e faaupuina ai le faameaalofa, o lea la o le a alu le eleele lea ae le o i lalo la. Ua le faamalieina la le 102. O le uiga o le tulai e faapuupuu se famatalaga, pe le mafai ona tapenaina se isi Tulafono e toe teuteu e faamalie le Tulafono lea ina ia aumai vaega ma tausaga sa i fafo ai le... ma pulea le tatou atunu ina ia faaofi i totonus o le 102 lea ina ia faamalieina, ona o lea e i ai le faaupuga lea, ma se isi lava faiga. E lavea ai loa la ma le gifted i le vaega lea o le Tulafono. A o le mea la o lou tulai, pe i ai se isi Tulafono o fou mai se i faamalie atoa le 102. O le uiga lea. Faafetai lava i lau Afioga i le Minisita mo le folasaga.

Afioga Hon Toeolesulusulu Cedric Pose Salesa Schuster (Minisita mo Punaoa Faalenatura ma le Siosiomaga): Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Minisita o Punaoa Faalenatura ma le Siosiomaga.

Afioga Hon Toeolesulusulu Cedric Pose Salesa Schuster: Faafetai mo le avanoa lau Afioga i le Fofoga Fetalai, ona o le vaega lea e saunoaina, o le tasi lea vaega o lea e faatalanoaina e le tatou Land Commission. Ae pau se tuualalo, o lea ua maua le finagalo o le a faapea ona silasila i ai i le Tulafono o tatou eleele ma le Matagaluega foi i mea tau Customary Land. A o se tasi lenei o vaega o lo o faapea ona faaali foi i le aso ananafi, o vaega uma ia o le Tulafono e ao ona toe silasila i ai.

Ae pei ona saunoa lau Afioga i le Minisita, o Court Grants ia na fai muamua ma ua i ai faaiuga ua leva ona maea, lea o lo o alu ai le tele o tatou faaiuga i le taimi nei. Ae leaga o lea ou te tau matau atu o le vaega lea e te tau talanoa mai ai, atonu o le a toe silasila lelei i ai le Matagaluega ina ia mafai ona fai le vaega lea e te saunoa i ai.

FOFOGA FETALAI: Ia, e i ai se isi mea o...

Afioga Auuapaaau Mulipola Aloitafua Mulipola: Faafetai i lau Afioga i le Minisita, o lea ua maua atu lau Afioga i le Minisita o feagai ma eleele tau le aganuu, ia o lea la ua ou matau, o lona uiga o le a faatalitali atu pe i ai se Tulafono, aua o le mafuaaga lena. E le o le lui o le faaiuga a le Faamsinoga, a o le toe faaatoa o le talanoa mai o le Mataupu 102 o le Faavae. Manuia lau Afioga i le Fofoga Fetalai. Faafetai.

FOFOGA FETALAI: Malo faafetai. Ia se i tulai mai lau Afioga i le Minisita o Faamsinoga.

Afioga Sulamanaia Fetaiai Tauiliili Tuivasa Lau Afioga i le Fofoga Fetalai mo le faasaoina o le taimi o le Afioga i le Minisita.

FOFOGA FETALAI: Se i tulai mai le sui usufono mo Vaimauga 1.

Afioga Sulamanaia Fetaiai Tauiliili Tuivasa: Sa usi lava le faalogologo ma le matau i le saunoaga a le Minisita. Ia o le faatauaina foi e lou sui usufono ou te le i faauilavea lava ona o le aso lenei e faapitoa lava mo le sauaina. Sa tuu lava se i tuuafu lava, a o lea ua maua lo matou avanoa matou te tulai atu ai. Pau lava le popolega lau Afioga i le Fofoga Fetalai, leaga o lea e faalogologo le atunu i le saunoaga a lau Sui Fofoga Fetalai i le 102. Faamolemole o lo o malu i totonu o le Faavae, e le mafai ona toe lu'i le 102, leaga o lea e faalogologo le atunu i le saunoaga a le... Seiloga lava e teuteu pe a maua le 2/3. Lau Afioga i le Minisita, faafetai lava. Sa taua e lenei sui usufono le tulaga i le vaega lea o faaiuga o Faamsinoga.

Afioga Auuapaaau Mulipola Aloitafua Mulipola: Lau Afioga i le Fofoga Fetalai pe maua se avanoa...

FOFOGA FETALAI: Ia o lea ua maua lou finagalo lau Afioga i le sui usufono mamalu mai Vaimauga 1. Ia ona o lea e pei e matau atu e pei e agai mai lau faasea i i i le faauilavea. E tasi lena mea o lea e faamanatu soo atu i le tatou Fono ina ia faataua pea le tatou Tulafono Tumau. Ae o lea foi ua maua atu, ae...Ia se i toe tulai mai le sui usufono mo Aiga i le Tai, e i ai se isi mea o...

Afioga Auuapaaau Mulipola Aloitafua Mulipola: Leai, ae pau lava lea lau Afioga i le Fofoga Fetalai o Tulafono Tumau sa ou tau tu atu ai, ae o lea ua e saunoa i le sui usufono, leaga o lea ua faauilavea mai, a o au lea e faauilavea i le Minisita. E faamanatu atu foi i le sui usufono mamalu, po o e manatua o le Taitaifono lenei e liuliuna Tulafono Tumau a le Maota ma... ia lea sa matou lauliliuna foi a outou Tulafono e 3 ia na aumai, po o e manatua. Ae matua malamalama lelei le sui usufono lenei i le 2/3 lea e taua.

FOFOGA FETALAI: E i ai le fautuaga a le Nofoa, o le a lua fetufaai ma faasoa, e le o se mataupu na laga e le Afioga i le Minisita. O le mea lea ou te faamalulu atu i sui usufono mamalu, taatia ia le avanoa i le Afioga i le Minisita o lo o saunoa i lana Matagaluega, ae taatia ia Tulafono Faavae ma mea na, o lea lava e molimau le tatou Maota i le tulaga o lo o i ai.

Afioga Sulamanaia Fetaiai Tauiliili Tuivasa: Ioe lau Afioga e ava tele lenei sui usufono, a e saunoa loa ua uma, leaga o lea ua agai sao mai lava. E tatau la ona avatu sau tali.

Lau Afioga i le Fofoga Fetalai e pei o lea e tau mai lana Taitaifono, ae le o malamalamala la i le power lea e i le 102. O le 102 e le mafai ona toe... seilogia e... A malamalamala foi lau Afioga i le Fofoga Fetalai i lau Sui Fofoga Fetalai, o lea lava e tuu i totonu o lou loto le aso lea na saunoa ai, fai mai ua tumu i le ava i le susuga i le Taitai. E pei ua faatonu atu le Nofoa, fai mai ana o au, ana o au, lona uiga ana o ia ua tuli. Talofa e, malo i lau Afioga le toa, malo le toa e taitaiina le...

FOFOGA FETALAI: Malie lau Afioga i le sui usufono mamalu, ia o le mea lena.

Afioga Auuapaau Mulipola Aloitafua Mulipola: Lau Afioga i le Fofoga Fetalai, pe maua se avanoa faamolemole.

FOFOGA FETALAI: Ua i ai le manatu lau Afioga i le Sui Fofoga Fetalai ma lau afioga i le sui usufono, a tuu atu nei oulua e te lua finau, ua alu ai ma le taimi o le tatou Fono. Taatia ia lua lagona seia i ai se taimi lua talanoa oulua, a o le taimi lenei, e faamalie atu o lea e faaauau le saunoaga a le Minisita. O le mea lea, ua...

Afioga Sulamanaia Fetaiai Tauiliili Tuivasa: Ioe, leaga o lea e faauilavea lou manatu i i, sa taua i lau lauga mea o le tuai ona aumai o iuga.

FOFOGA FETALAI: O lea ua uma ona saunoa le Minisita.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Lau Afioga i le Fofoga Fetalai pe maua se avanoa.

FOFOGA FETALAI: O le a la le isi mea o lea ua uma ona saunoa le Minisita i faiga faavae a le Faamasinoga. O la e ua manino lava le saunoaga a le Minisita, ma e leai foi se isi e faafinai i le tulaga lea o la e ua saunoa manino le Minisita, ma o le saunoaga mulimuli foi lea.

O le mea lea, tulai maia lau Afioga i le... Se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi: Ioe, e ava tele atu i lau Afioga i le Fofoga Fetalai. Na faaiu foi le tatou aso ananafí o tau faafilemu lava le mea lenei. Ae pei lava e manaia le taeao lenei ae tuli loa se isi i fafo. Ma lou agaga faaaloalo.

FOFOGA FETALAI: O le agaga lena o le Nofoa o le faatoofilemu ma toamalie le tatou Maota, leaga o lea e faafogafoga le atunuu. A tatou o foi i tulaga faapena, ona faapea foi lea ua sauva le Fofoga Fetalai. Ona faapea lea, tou malilie ia, taatia o tatou lagona e i ai taimi e faapena, ae a oo loa i taualumaga o le Fono, o lo o i ai le issue o lo o talanoaina, ma o lo o fitoitonu i le Afioga i le Minisita o Faamsinoga. Tulai mai lau Afioga i le Minisita e faaauau lau saunoaga.

Afioga Hon MATAMUA SEUMANU VASATI SILI PULUFANA: Faafetai tele. E momoli atu le faafetai tele. E aoga lava mea faapea e faate'i mai ai le tatou taeao, atonu e maua mai ai ma isi manatu. Ae faamalo saunoa. Ou te faafetai atu i le fautuaga sa tuuina mai. Atonu ua alagatatau, ua alagatatau ona toe tilotilo i ai, leaga e taua foi mo tatou ua taua o tagata Samoa. Ae ua lelei, taatia mai, e pei ona saunoa atu le Minisita ia Toeolesulusulu, lea o le a feutagai maua, ona e fesootai maua i le Tulafono lea.

Ona faaauau ai lea o...

FOFOGA FETALAI: Ia, lau Afioga i le Minisita, ou te vaelupeina le saunoaga a lau Afioga. Atonu e aoga foi le fai o le tatou malologa tatou toe taliu mai ua toe fotuai sou finagalo fou.

O le mea lea o le a faataatiae galuega a le Fono Aoao mo lana malologa masani o le taeao.

Na faataatiae Taualumaga o le Fono Aoao Faitulafono mo lana malologa masani i le itula e 10:45 i le taeao ma toe faaauau i le itula e 11:16 i le taeao.

FOFOGA FETALAI: Ou te faasila atu ua toe amatalia nei Taualumaga a le Fono Aoao Faitulafono.

Ou te tapa ma le faaaloalo lau Afioga i le Tamaitai Palemia mo le Lafo.

LAFO MO LE TEUTEUINA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, ia o lea ua maea paleauau le taligasua a le paia o le Palemene e ala i le taumafataga o le taeao. Ia ua i ai foi se manatu ua i ai se faasiligamalosi e faaauau ai le tatou galuega. Faafetai tele i lau Afioga ma le tatou Ofisa o le Fono mo le tautuaina o le Palemene.

I le faagasologa ua oo i ai le tatou galuega e silafia uma e le Palemene toe o taeao le aso mulimuli ma e tatau ona laasia ai le faitauga faatolu o le Tulafono Tau Faaofi o le Faatatauina o Tupe 2023/2024.

Mo le sologa lelei o a tatou taualumaga ia ou te manatu ua tatau ona faaopoopo nisi itula o le tatou galuega mo lenei aso ia ma tatou mataituina pea po o le faaauau seia oo i vaveao, ona faauma ai lea taeao o le tatou faamoemoe.

Ae mo lenei taimi ou te faatuina le lafo e faapea, *Ina ia faataatiae tatou Tulafono Tumau 32 mo le suia o tatou Itula Fono mo le aso Fono lenei e faapea, o le a faaauau pea tatou taualumaga seia aulia le itula e 1.00 i le aoauli nei, ona faataatiae lea mo se malologa ma tatou toe tauaofia i le itula e 2.00 i le aoauli ma faaauau atu ai seia aulia le itula e 5.00 i le afiafi a nanei. Ona toe faataatiae lea mo se itula tatou te malolo ai ma toe tauaofia i le itula e 6.00 i le afiafi, seia tolopo i le itula e 10.00 i le po a nanei.*

Lau Afioga o le lafo lea ma le faaaloalo.

Faaluaina e le Afioga i le Sui Palemia faapea le Minisita o Galuega, Felauaiga ma Atinae Eseese.

Na faamaonia le Lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2023/2024.

FOFOGA FETALAI: E faataatiae a tatou Taualumaga mo le malologa o lo o saunoa le Afioga le Minisita o Faamsinoga ma Pulega Tau Faamsinoga.

O le mea lea ou te tapa lau Afioga i le Tamaitai Minisita mo le faaauauina o lau saunoaga.

Tofa Hon MATAMUA SEUMANU VASATI PULUFANA: Ia, o le mea sili ua saoialo le tausiga a le mamalu o le usugafono, e momoli atu ai le faafetai tele i lau Afioga ma le Ofisa e tusa ai ma lea tausiga. Ae, lau Afioga

i le Fofoga Fetalai ou te toe fia oo lava i le mataupu sa lagaina mai e le sui usufono mamalu o le Itumalo o Faleata Nu.4, e uiga lea i se headline i le Observer faasalalau ai sou manatu faapea, o le a le toe iloiloina Tulafono e tolu, pei ona tapisa ai foi le Atunuu i na tausaga ua mavae. E faamalulu atu i le sui usufono mamalu ona e leai sau faaaliga faapea sa fai i luga o se Nusipepa, o le a le toe faia ni teuteuga i Tulafono e tolu lea ua taua nei, o le Tulafono Teuteu o le Faavae 2020, Tulafono Faamasinoga 2020 ma le Tulafono o Fanua ma Suafa 2020.

O le mea moni o se tasi lea o anavatau a le Faigamalo o le toe silasila lea ina ia faamautu ma faamausali le pulega faaletulafono, aemaise o Tulafono faaleleia e aofia ai ma Tulafono nei e limataitaiina ai le Faamasinoga. Ma ou te fia tau atu foi i le sui mamalu e tumau pea lea anavatau e le o aveesea. Ua maea nisi teuteuga e pei ona silafia e le Maota ma o lo o faaauau pea ona mataitu e le Matagaluega le faatinoga o lenei Tulafono ma toe iloilo, tilotilo i teuteuga talafeagai e ono moomia. Ia ae pei ona faailoa atu, o Tulafono nei a le Faamasinoga o Fanua ma Suafa e aafia uma ai tagata Samoa, tagata o lo o alaala ma papaaao i Samoa nei faapea tagata o lo o alaala i Atunuu e mamaao.

Ona ou oo atu lea i le mataupu e pei ona sa fesiliglia ai e le sui mamalu mai Satupaitea faatatau i le siitia mai o le Ofisa ma le Fale o le Faamasinoga o lo o i Tuasivi i Salelologa. O le taimi nei ua taoto le fanua ua fuafua e faatu ai le Ofisa ma le Faamasinoga i Salelologa. Ua maea foi ona tusia le ata o le galuega ma o lo o iai nisi feutanaiga o lo o galulue ai nei le Matagaluega ma le Tusiata ina ia taoto i le agatonu le ata o le galuega. O lo o tausaili foi se fesoasoani mo le fausiaina o lenei galuega ma afai lava e siliga i taliiseu se fesoasoani ona taumafai loa lea e faatupe i le Tala Faatatau o le Tupe a le Matagaluega.

Lau Afioga i le Fofoga Fetalai ma le mamalu o le Maota, na laga mai e le Sui mamalu mai Safata 2 se fautuaga e uiga i le ofisa o le Komisi o le Toefuataiga Tulafono a Samoa, Samoa Law Reform Commission ma e pei ona silafia o se tasi lea o Ofisa o lo o i lalo o lau matafaioi Faaminisita. Ia ou te faafetai tele atu i le fautuaga e pei ona tuuina mai ina ia toe tuuina atu le Komisi o Toe Fuataina o Tulafono a Samoa i lalo o le Ofisa o le Loia Sili. E iai le manatu ia taoto mai ua faamauina le finagalo o le Sui mamalu ae mo le silafua o lo o faagasolo pea le iloilogia, review a le Komisi o Galuega a le Malo e toe fetuunai ai auaunaga talafeagai a matagaluega uma o le Malo e aofia ai ma le Ofisa o le Komisi o le Toefuataina o Tulafono a Samoa. O le faamoemoe autu o le Komisi o le Toefuatain o Tulafono a Samoa e tusa ai ma lana Tulafono ia faafaigofie le iloiloina, toefuataina ma le atinaeina o Tulafono a Samoa ina ia mafai ona unaia tu ma aganuu a Samoa. Faamalosia tulaga i le vafealoai, aganuu, tamaoaiga ma le atinae o pisinisi a Samoa ia faamautino le tausia o le Tulafono a Samoa i se tulaga faaonapoina lea e faamalieina ai manaoga o le Malo ma le vaega o tagata lautele.

E iai foi lou talitonuga e lei alotamala i latou o e na taulagalaga ma taulamua i lenei faamoemoe, o le faatuina o le Komiti ma avea ma Ofisa e tutoatasi mai le Ofisa o le Loia Sili po o se isi lava Ofisa o le Malo, ina ia mafai ona fai ni fautuaga tutoatasi, independent recommendation i ni teuteuga manaomia mo Tulafono a Samoa.

Ia lau Afioga i le Fofoga Fetalai e aveatu le faafetai tele i Sui mamalu o le Maota sa saunoa ma faasoa mai o latou finagalo i lenei matagaluega, o le Matagaluega o Faamsinoga ma Mataupu Tau Faamsinoga faapea le Komisi o le Toefuataina o Tulafono a Samoa, Samoa Law Reform Commission.

E iai le talitonuga o le tele o sulu e maua ai figota, ia agalelei le Atua i lau Afioga i le Fofoga Fetalai ma le mamalu o le Palemene. Faamanuia foi le tapuaiga a si o tatou Atunu o Samoa, soifua ma ia manuia.

FOFOGA FETALAI: Malo faafetai, malo saunoa i lau Afioga i le Minisita o Faamsinoga ma Pulega o tatou Faamsinoga. Atonu o lea ua malamalama le tele foi o nisi o mataupu sa lagalaga e nisi o Sui ia faafetai mo le faamalamalamaga ma le tapenaga ia lea ua maea ai lea tulaga i le matagaluega. O le mea lea malo faafetai i lau Afioga i le Minisita ia faapea foi le Ofisa Sili ma le Matagaluega o Faamsinoga ma le Pulega o Faamsinoga ia faapea foi Tulafono Toefuataina.

Ia ua oo mai le tatou faasologa i lau Afioga i le Minisita o Tina ma Tamaitai ma le miliona.

Afioga Hon LEOTA LAKI LAMOSITELE (Minisita mo Tina ma Tamaitai, Atinae o Nuu ma Afioaga ma Agafesootai): Faafetai mo le avanoa lau Afioga i le Fofoga Fetalai ma le mamalu o le Maota i lenei taeao. Ae ou te lei alagaina lupe o le fufui mai le Tuasivi ua maea ona laelae le au savavali ma le au asavao. Ae ou te lei asaina foi le pupue o auma ma faatutala i fisaga sei elielia ai le alofa ua tino i le ulugalu faaaloaloga. Ou te tu nei siupapa ae faataumata i muliauna aua o lele ua faaaloalo tafa le tai o laulapa, ae ua tulai e faamalamalama nisi o vaega na afea i saunoaga a Sui mamalu e patino i nisi o vaega na laga i le Tala Faatatai o le Tupe patino i le Matagaluega o Tina ma Tamaitai, Atinae o Afioaga ma Agafesootai. Ona ligalua lea o le tautalaga i le Ofisa o Fuainumera Faamauina. Ae lei oo se faamatalaga i vaega taitasi e muamua ona ou ofo alofa atu i le Fofoga o le Maota afio lau Afioga i le Tamaitai Palemia, Sui Palemia ma le Kapaneta mamalu ma le saofaiga a Minisita Lagolago. E ofo alofa atu foi ma faatalofa atu i lau Afioga i le Taitai o le Itu Agai ia ma lena talaga atoa. Faatalofa atu foi i le tapuaiga mamalu a Samoa i ona tulaga faalupe, faalemalu, mamalu faaleaganuu mamalu faale-ekalesia o lo o tapuai mai le usugafono a lo tatou Atunu. E ofo alofa atu foi i le tapuaiga a si ou Itumalo amata mai Nuuuli

seia paia Faleolu, le afifio o Tapaau e fa ma Tootoo e fa. Malo afua ailao ua maua.

Faafetai tele mo Sui mamalu o le Maota Faitulafono sa afea le Tala Faatatau o le Tupe mo le Matagaluega o Tina ma Tamaitai, Atinae o Afioaga ma Agafesootai ia faapea foi ma le Ofisa o Fuainumera faamauina.

Ua ou manatu a o lei faia se faamatalaga i mataupu sa afea i saunoaga a Sui mamalu o le Maota, ou fia faatepa lava le Maota mamalu i faamuamua o lo o tuliloa i lalo o le Matagaluega a Tina ma Tamaitai, Atinae o Afioaga ma Agafeesootai. E pei ona silafia o le tatou matagaluega o lo o taulamua i le faatinoina o polokalame o Atinae, le atinaega o tomai ma agavaa o tamaiti, tupulaga talavou ma fanau ma i latou e iai aafiaga tumau o le soifua. Ona o nisi nei o itutino o lo o faamauina ai faamaumauga fuainumera o lo o aafia i tulaga maaleale o le soifuaga lenei. O lo o iai Tulafono patino o lo o faavae ai nei galuega taua e le gata i lena ae o ana matafaioi tauave i lalo o feagaiga faavaomalo ua saini aao ai Samoa, e pei o le CEDAW, CRC ma le CRPD. O le tatou matagaluega foi o lo o nafa ma le atinae o Afioaga lea e fesootai ai ma le polokalame o le atinae o Itumalo ia po o se faaupuga lea ua lauiloa i le tatou Atunu, o le polokalame o le miliona tala.

E lua vaega maoti o le atinae o le tatou Atunu o lo o fai sao iai le tatou Matagaluega. O le Vaega Maoti o le Atinae o Afioaga faatasi ai ma le Vaega Maoti o le Atinae o le soifuaga lautele. O lona uiga e taua tele le galuega a le tatou matagaluega ma e fesootai ma so o se faatinoga o isi vaega maoti e 14. E ao foi i isi vaega maoti ona amanaia ni faatinoga mo le atinae p Afioaga ma le soifua lautele o tagatanuu o le Atunu lenei aemaise lava i Tamaitai, Tupulaga Talavou, Fanau ma i latou e iai aafiaga tumau o le soifua. O le tulai mai o le tatou faigamalo ua tele le suiga ona o faamuamua o lo o faatulaga i faiga faavae o lo o taumafai i le tausaga faaletupe lenei e faamaea ma ua faauau tala o le tupe e pei ona talanoaina nei e le Maota mamalu.

O le matau a le Matagaluega o se matatia ua ausia e le gata ina faamuamua le atinae o le soifuaga lautele o Tamaitai, Fanau, Tupulaga Talavou ma tagata e iai aafiaga tumau o le soifua. Ae o le mea lea ua mafai ona faatupeina, ua faamausalai ai foi galuega faapaaga i le va o le matagaluega ma faalapotopotoga tumaoti ia ma paaga atinae ma isi Atunu. E le gata i matagaluega patino o loo i lalo o le matagaluega lenei ua tuuina foi le tai miliona tala e faamaite mai ai Itumalo i vaegataua e lima o lo o i lalo o le faiga faavae mo le atinae o Samoa 2021 – 2026, lea e faamuamua ai le atinaega o le soifuaga lautele.

I le matau atu o le tele lava o saunoaga na afea ai lenei matagaluega o lo o agai i le faatinoga o le polokalame mo le atinae o Itumalo. E muamua ona momoli atu le faafetai ma le faamalo i lau Afioga i le Fofoga Fetatalai o le Maota ma Sui Faipule uma o Itumalo e 51 mo le lagolago aemaise le faamalosiau i le faatinoga o la tatou polokalame lenei. O le aoaoga ua mautinoa mai i le faatinoga o lenei polokalame, o le taimi muamua lenei ua

faatino ai lenei ituaiga atinae i totonu o le tatou Atunuu. E tele ma anoanoai lutau, o lo o faatino lava le tatou polokalame ma aoao manogi e poupou ai le agai i luma o le tatou polokalame. O le luitau o lo o tutaia ai le faagasologa o nisi o atinae o le taumafaiga ia mulimultaia taiala ua maea ona faataatitia mo le faatinoina o le polokalame lenei.

Lau Afioga i le Fofoga Fetalai o le Maota ou te manatu foi o se avanoa taua lenei e folasia ai tulaga ua oo iai le tatou polokalame mo le atinae o Itumalo mo le silafia o le Maota. Mai le \$200,000.00 sa tuuina atu mo le fausia o Ofisa o Fono Faavae e oo mai i le taimi lenei ua maea lesitala Fono Faavae e 51, e 50 Fono Faavae ua iai o latou Ofisa 49 Fono Faavae ua maea ona tuuina mai lipoti a le Suetusi i le faaaogaina o le \$200,000.00. E 46 Fono Faavae ua maea ona sainia maliega tau tupe ma ua faagasolo le tuuina atu o le 15%, 44 Fono Faavae ua maea ona tuuina atu le 50% muamua pe o le \$425,000.00, 21 Fono Faavae ua maea ona tuuina mai lipoti mo le faaaogaina o le uluai 50% ae na o le 6 ua pasia aloaia e le Komiti mo le faagasolo o le tuuina atu o le vaega mulimuli o le miliona tala muamua. E 18 Fono Faavae o lo o faagasolo iloiloga a le Komiti galulue ia latou lipoti.

Lau Afioga i le Fofoga Fetalai o le Maota mo le silafia e Sui mamalu sa saunoa i le tuai ona tuuina atu o le vaega mulimuli oa latou miliona muamua. E pei ona taumafai atu i le taimi ua sola ua maea ona faataoto taiala m alafua e ao ona mulimulitai i le faatinoga o le poloketi lenei ona o nei tupe e faaeteete lava iai aua o tupe a tagata lautele e ao ina faaaloalogia tauala ma le faagasologa ina ia sosolo faaiuga fai i luga o taiala. E 18 Fono Faavae ua tuuina mai a latou lipoti o le faaaogaina o le \$425,000.00 muamua peitai o le to'a ona o le le atoatoa mai o vaega e tatau ona tuuina mai. O le faatautauga e le o aumaia lisiti ma lipoti tusitusia o vaega na faaaoga iai tupe nei. O lea ua galulue atu le Komiti e fai fesootaiga ma Fono Faavae ina ia tutusa le malamalamaaga i vaega o lo o misi e tatau ona tuuina mai. Sa taua i se saunoaga a se tasi o Sui mamalu ina ia faia se fua ona o lea o le a tapuni le tausaga faaletupe ae lei taitai maea ona faatino le tuuina atu o le uluai miliona tala.

Mo le silafia o Sui mamalu ma isi foi Sui o lea ua maea ona pasia e le Kabeneta le toe tuuina atu o le taimi faatulagaina mo le tuuina atu o le uluai miliona, tuu atu ia Tesema 2023. Ona e le o tutusa uma Itumalo ma latou faatinoga peitai e le taofia ai le faatinoga o le tuuina atu o le miliona tala pe a pasia le tala faatatau o le tupe o lenei tausaga.

O nisi o mataupu sa laga mai e aofia ai le faaaogaina o taavale ma masini mo le faaaogaina e le Ofisa, ia ua faamauina ia a outou talosaga ona o lea o lo o loma ia le iloiloga o tatou polokalame ona mafai ai lea ona toe fetuutuunai i lalo o taiala ia vaega ia.

A o le fautuaga i mea a nei i le tatou ofisa, o luitau o lo o feagai foi i le matau atu ma Fono Faavae, ia a aumai foi le taavale ia aua e iai foi tau e agai iai le taavale, o le tau o le penisini o le tatu e faatotoga ai le taavale, o le tau

e toe fai ai le taavale. O tau faaopoopo uma la ia e toe faaopoopo atu iai pe a faapea o le finagalo lea ae le fai ai, sei fai le tatou iloiloga ia ona maua ai lea o le tali. A o sina fautuaga vaivai iai, o le matau atu ua tele ina uma ona faatotoga lelei outou ofisa ua iai uma a mea uma i totonu o le ofisa, air condition, eamalulu o le mea lea o le internet, computer, printer, vai, eletise, paoa, o meaafale. O le fautuaga la ia faaaaoga faalelei ia tou Ofisa ona a ou fuafua atu iai e le tau feoai aua o lea foi e mafai ona faaaaoga le internet e fai ai faatauga i luga o mea uma a, transfer i le Blue Bird, transfer i le SSAB. O le faiga foi o le atou procurement lena ua iai i lalo o le taiala la e mafai a ona fai lava i luga a o le mea lea o le initaneti pe a faapea e mataala le tatou Fono Faavae. O le auala la lea e le faaaaogaina ai ni taavale aua o lena tatou te silafia lelei.

FOFOGA FETALAI: Malie lau Afioga i le Minisita sei tuu atu le avanoa i le Sui o Gagaifomauga Nu.2 ona tuu atu ai foi lea i o i mo Anoamaa Nu.1. Lau afioga i le Sui mamalu.

Tofa Foisala Lilo Tuu Ioane (Gagaifomauga Nu.2): Ia faafetai lau Afioga mo le avanoa, e leai se manatu e fia faalavelave i le saunoaga matagofie a le Afioga i le alii Minisita e ou le faamoemoe. Ona o lea ua oo tonu a le saunoaga a le Minisita i le mea foi sa laga e lenei sui e ala i taavale, ia na ona tuutuu atu i autafa o lau Afioga. O lea ua faalogologo atu foi ma le totoa, o le utuina, o le faapa'uina, o le siakiina, ia matou te talitonu e laititi le tupe e fai ai le fuafuaga lea nai lo le hire o taavale a le Nuu e faaaaoga i asiasiga a le Komiti. Ae na ona tuutuu atu i autafa o lau Afioga.

Ia ma le lua, o uta i o i le matou faaitu e leai ni internet e maua i uta i le togavao, e tatalo atu ai ma le agaga faaaloalo i lau Afioga atonu e eseese a Itumalo ma mea o lo o tutupu ai. Ia o se matou tuualalo lea i lenei vaega o le aso.

FOFOGA FETALAI: Ia se i tulai mai le sui usufono mo Anoamaa 1.

Afioga Alaiasa Moefaaouou Malagaitutogiai Sepulona Moananu (Anoamaa 1): Faafetai mo le avanoa i lau Afioga i le Fofoga Fetalai, leaga o lea e fai a le saunoaga a le Minisita ma vaai mai ia te au. Ai ona o lea ou te lagolagoina a mea uma o finagalo iai le Minisita i lenei poloketi. Ae o si faiga faavae la e faataga, e faataga ona fai le rental car e le poloketi. A e fua la a faapea e faaaaoga e tolu ifo masina ua lava le tau o le taavale e faaaaoga e le poloketi. E pei o nai vala ia e alai ona matou faapea e tau te fetuunai foi lea i mea o taavale, ia a o le faiga faavae a ia o la e mulimulitaia a e oo mai le taimi nei, ae na o ni nai talosaga e tuu atu i lau Afioga ia ma le agaga faaaloalo.

FOFOGA FETALAI: Malo.

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau Afioga i le Fofoga Fatalai...

FOFOGA FETALAI: Mo le faasaoina o le taimi o lau Afioga i le Minisita sei tulai mail au Afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Ua tulai atu pei o le agaga lea lau afioga i le Minisita ona o lo o manaomia ia tulaga tau taavale ona o asiasiga i uta i faatoaga , pei e tasi lea mafuaaga ae le faapea o le agai mai ai i Apia ma feoai. Ona e pei ona silafia e fia faaaaogaina taavale ia e le mafai la ona faaaoga le initaneti ina mea e tatau ona agai le taavale i uta ma alu e asiasi faatoaga ma maumauga ma mea o lo o i uta iina. Ae ona o le tulaga lea sa e..... lea faatoa pasi laititi atu a le tulaga o le tupe lea sa e taua faamolemole e fiamaua ai se malamalamaaga atili ona o le faaaaogaina o le tupe. E pei o lea sa ou tautala i le puupuu o le taimi, le faaaaogaina o seleni a o lea la pei ua manino mai o Tesema e faamatuu ai le \$425,000.00 lona lua lea ua tuu i le special account. A o lona uiga la o Tesema, Ianuari, ia na o le lima masina e faaaoga ai le miliona lea pe a pasia le tala o le tupe lenei, ia e fua atu e pei e utiuti le taimi ona nei le fetaui ma mea o development plans. Aua manatua lau Afioga lea ua aveatu ia development plans foi ie a le matagaluega pei ona manaomia mai. O la e la e faataoto ai ma le taimi i le faagasologa o fuafuaga ia ma vaegatupe e faaaaoga ai. O lona uiga o le a le fetaui atoa a pe a fua i taimi ma tulaga ia masalo o lena ua maua mai le atugaluga lau Afioga.

FOFOGA FETALAI: Faafetai o lea ua maua lou finagalo. Se i tulai mai le sui mamalu mai Faleata Nu.4.

Tofa Ale Vena Ale (Faleata 4): Faafetai lau Afioga Fofoga Fatalai mo le avanoa, faafetai atu i lau Afioga i le Minisita e ou le poloketi o le miliona. E pei o au foi le isi sui sa tele foi ina talosagaina lau Afioga ma le isi mea i le taimi nei lau Afioga i le alii Minisita pe ua e silafia ua matua sioki uma mea tau uea pa puua, uea foi ia chain link ma tulaga faapena. O le mea lea ua tau fuafua atu iai e tau oka mamao atu, a le o lena foi e sili ai le aumai Fiti ma Niu Sila ma sau sao a le oka a le Itumalo lenei pe a ua..... O isi mea e uma totogi siaki tai fia sefulu afe i Kamupani ae tolu, fa vaiaso e lei maua mai mea, ia na ona fesoasoani atu i lau Afioga, faafetai.

FOFOGA FETALAI: Ia, lau Afioga i le Minisita.

Afioga Hon LEOTA LAKI LAMOSITELE: Ia o lo o faamauina lava ia finagalo e pei ona tuuina mai. O le tulaga lea i le Afioga i le Taitai o le Itu Agai, sei fai sina faataitaiga e lelei e faigofie ai. A faapea o lau Itumalo lea e faaalu nei le \$425,000.00 i le taimi lenei masalo toeititi maea ona faaaoga ona aumai loa lea o le lipoti i totonu ina ia toe aveatu ai le isi \$425,000.00 o le tatou miliona lea e fai. O le \$425,000.00 mulimuli la lena lea e tuu atu ia Tesema le faaaogaina manatua o le miliona muamua lea tatou te alu ai nei i le tausaga lenei. O lea ua tuu atu ia Tesema e tatau ona oo atu iai ua maea ona faaaoga le 425,000 mulimuli lea ou te talanoa atu ai. Ae a faapea la o la e toe fotufotu mai tou talosaga mo le isi miliona lea o le a alu nei i le tausaga lea e uma taeao ia ona fai laia o le tou fuafuaga i le taimi e faamaea ai le tou 425,000.00 lea ma le taimi e toe amata ai le isi miliona.

O le mataitu la a le tatou Polokalame a faapea foi la e oo atu ia Oketopa tilotilo atu o la e faapena ona taulemu mai isi Itumalo e faigofie lava ona fai le tatou fetuunaiga aua o lea tatou te fou uma i le mataupu, o le auala la lea e mataitu ai ona o le tulaga lena, o lona uiga e leo iai ma se avanoa e faapea ai o le a faamamulu ese se miliona e leai, o lea lava tou te faalogologo e leai foi se Itumalo o le a ou faiatu e faamalolo i le taimi lenei, o le lava e mataitu lava e le tatou polokalame o le faagasologa o le vaega lea, e pei o se faaaliga atu lea ma le faaaloalo i le mamalu o Sui sa latou fesiligia le mataupu lea.

E pei ona ou fai atu i mataupu i le tulaga i tatou taavale ma masini oloo iai le gaioiga a le tatou Komiti oloo fai ina ia iloilo ma le toto'a ai ae e pei mea ia na ou tolaulauina atu nao sina fautuaga, ae o le mea la e malie ai o lea na ou faataitaia i le matou Itumalo i Savaii e leo iai ma se mea faapena o popole mai ai ao oo a i le taimi e fai ai totogi a le aufaigaluega a na e iai le bank transfer aua o lena e iai te outou le authority e mafai ai,na oma imeli mai a o le payroll siaki, na ona uma lava ona siaki approved transfer i totonu o le account a le tagata lea. E le'o iai a ma ni feoaiga e fai ae pau le mea o le fautuaga foi a nai Matagaluega ia oloo maua ai le fesootaiga sei silasila ane ina ia faaola ane le tatou initaneti ina ia fetaui lelei ma talafeagai ma tulaga ia. E le faapea la o se isi itu ae e pei o nai mea ia e mafai ona tipitipi ma faatoatoa le faaaogaina o le tatou Ofisa, ae manatua foi e nao le \$150,000.00 lea e auvatu tou te faasoaina. O lena ua faataatia atu o lena e ia te outou le tofa ma le moe e faasoaoosa le tatou seleni lea ua faamatuu atu. Ia e pei ona tuu atu le faamatalaga foi inai fautuaga ina ia mafai ai pea ona faaaauau le tatou polokalame. E momoli atu le agaga faafetai i le Komiti Faafoe ma le Matagaluega i la outou lagolago malo le onosai malo le faapalepale. O le talosaga a lenei Matagaluega ia maua pea e outou le agaga o le galulue faatasi.

O nisi o vaega na afea ai lenei Matagaluega i saunaoga a Sui mamalu mai Sagaga 2 ma Gagaifomauga 1. Na fesiligia e le Sui mamalu o Sagaga 2 nisi o polokalame a le Matagaluega o Tina ma Tamaitai, o fesuiaiga ua faatino ai le taitaiga o le Matagaluega i tausaga ua mavae na afua ai ona le toe

faatinoina e le tatou Matagaluega le Polokalame taua o le Aiga ma Nuu Manuia (ANM). Silafia e le Sui mamalu o le Tala Faatatau o le Tupe lenei o le a faaiuui sa tuuina mai le faatinoga o le polokalame mo le faaleleia o Fale Komiti o le vaai mamao na amata mai ai iina le toe faaaolaolaina o le tatou Polokalame taua o le Aiga ma Nuu Manuia (ANM) lea e galulue malosi ai tamaitai o le atunuu lenei e tapisa ma faatino faamoemoega taua e tuliloa ai le soifua manuia ma faavae ai le soifua maloloina ia ausia ma amanaia ai le tumama lautele. E amata mai i tafā maota ma laoa seia oo i tafāala ma faasolo atu i tafailagi ma le tuasivi. E ui lava la ina leai se vaegatupe faapitoa mo lea polokalame taua ae ua faamauina ma le agaga faafetai le taulagalaga ma le tuualalo a Sui mamalu mo le agai i luma.

Na fesiligia foi e le Sui le tulaga ua taumoloau atu le “Polokalame mo le Unaia o Avanoa Tutusa mo Tina ma Tamaitai”, ua leiloa foi poo le a le tonu o le Matagaluega e nafa ma le atinae o tupulaga talavou. O nisi nei o fesuiaiga sa faatinoina i le 6 tausaga ua mavae ma see ai le faatinoina o polokalame a le Matagaluega mai le faatinoga o Polokalame mo Tamaitai, Fanau ma Tupulaga Talavou i le faatinoga o polokalame e fua i le ulutala e pei ona iai nei. Mo le silafia e le Sui mamalu o le Matagaluega o Tina ma Tamaitai oloo iai le Tulafono e taulamua mo le atinae o Tupulaga ma le faatinoga o le tautinoga a Samoa i lalo o le CEDAW.

O le taimi lenei o lo o faagasolo le iloiloga o galuega a le tatou Matagaluega ina ia toe faatulaga faiga faavae ma ana fuafuaga mo le toe faatulagaga mo le faataotoga o le Matagaluega e leo toe mamao lea galuega ina ia mafai ona toe faatonutonu faagasologa o galuega a le Matagaluega mo le isi 5 tausaga. O le naunautaiga lava o le matagaluega ia lava alaoa e faatino ai pea manu lauti oloo tuliloa e le tatou matagaluega mo le atinae o Tamaitai, Tupulaga Talavou ma Fanau.

O lo o faamoemoe a o faagasolo le tatou polokalame o le atinae o Itumalo o le a ave faamuamua i le atinae ma le faaleleia o auaunaga o tamaitai, tupulaga talavou ma fanau. E tau fesootai le fesili o le Sui o Sagaga 2 ma Gagaifomauga Nu 1 pei ona tali atu i luga oloo faagasolo nei le iloiloga a le tatou Matagaluega ma o se tasi lea o manu lauti o lea faatinoga.

O lo o taimua lava le faatinoina o le polokalame mo avanoa tutusa i taitaiga i le itupa o tamaitai, o se faataitaiga e mafai ona outou molimauina atu, ia outou silasila atu i tua atu o au nei, o le saofaiga o CEOs, ACEO's o le tele o saofaiga lea o tamaitai. O le polokalame lea o lea ua fua mai o lea ua siitia ai le iai o tamaitai i le tele o vaega eseese o le tatou atunu, ae le gata i lea e pei ona auvatu foi i tatou taiala o Fono Faavae o le afa o Fono Faavae e tatau ona tamaitai, tasi la lena galuega ua fua mai. Lea la ua outou faalogologo atu nei tali mai o Fono Faavae ou te talitonu ona ua tele le saofaiga a tamaitai la ua iai totonu.

E le faagaloina foi le sao o Sui Tamaitai o Nuu (STN)lea ua leva ona fai paaga ma Malo ma le nuu i le latou sao foi. O lea ou te mafaufau poo le lua

i le tolu tausaga talu ai ina ua matou tulai mai i le foe e matau ai iina e \$200 le alauni a le Sui Tamaitai i le masina ae 250\$ le Sui o le Nuu (SN) ia o se vaaiga a le tatou Malo e le talafeagai lea mea pe afai o lea tatou te mananao e ave i luga o le mea o le taimua tutusa, lea na sii ai loa i luga totogi o Sui Tamaitai i le 300\$ ia latou alauni tuufaatas ma le Sui o le Nuu ona o le agaga lena sa iai ina ia maua ai pea le avanoa lea e faaauau ai le tatou taumafaiga lea.

Ia e avea ai lenei avanoa e faafetaia ai le lagolago a Sui o Nuu, Sui Tamaitai o Nuu ma Sui o le Malo e faafetai atu i lo outou tautua i le atunu ma le fesoasoani mai i le tatou tapenaga a le tatou Matagaluega, mo le teuina o le tatou malae i Tiafau i le faailogaina o le 60 & 61 Tausaga o le tatou atunu. Oloo talia nei se talosaga faapitoa i le Kapaneta e maua ai sina taui talafeagai mo mea sa outou tau aaoina mai, ia ma nisi foi o mea sa faaleagaina talu ai le leaga o le po na fai ai lea sauniga.

Ia ona ou see mai lea i le Ofisa o Fuainumera Faamauina,

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai...

Susuga Maulolo Tavita Amosa: Lau Afioga i le Fofoga Fetalai.

FOFOGA FETALAI: Malie lau Afioga i le Minisita e iai nai Sui ia e fia tulai mai, se i tulai muamua le sui usufono lea o Sagaga Nu 3, ona sosoo atu ai lea ma Sagaga Nu 2.

Afioga Hon Sala Fata Pinati (Sagaga Nu 3): Ia faafetai i lau afioga i le Minisita mo le folasaga matagofie, lau Afioga i le Minisita ma le paia o le Maota o le Itumalo lenei o Sagaga Nu 3 ia leaga o itumalo faapalota e leo taatia le aganuu ae faaaoga le faapalota faapalagi o le ala foi lena na faapipii mai ai Aleisa i lo matou nuu. Sa leai foi se taofi o se tulaga faapea na oo iai, ma e leai se maliega ia te au nei poo le matou nuu i le tulaga lea o feseseaiga o le fevaeai o Itumalo ae peitai ane o le usitai lava lea na faatino ai. O lo'u tulai atu la i lenei vaega o le aso faafetai atu a i le folasaga e pei ona aumai, ae o le agaga e avatu ai o le \$200,000 na aumai na o le \$200,000 na aumai. E pei lava ona avatu i se taimi ua fano le tolaulauga ma le faaaogaina o le tupe na manino a le aumaiga o le matou bank statements poo mea na faaaoga e matou na ave lea i le Suetusi, na uma lelei ona fai suetusi na momoli atu lea i le Ofisa. O le agaga lea ou te tulai atu ai pe maua sa matou tupe pe leai aua o le mea moni a ia e iai le agaga foi lea o tatou, o tatou a e tasi o le atunu lenei o Samoa no one is left behind, tatou a ia e o faatasi tatou te lululima ma tatou lulu aao faatasi o le a lava le mea e tupu ia sa'e ae lava le vaa ao la tatou te o faatasi ai, ae le'o manaomia ia ituaiga tulaga foi ia o ai e faamuamua ao ai e faamulimuli, o lea ala lea, ou te le faapea atu a mea e a,

ou te talitonu foi e iai a mea e tutupu e aunoa ma le silafia e aiga minisita ae nonofo a lalo ma fai le faaiuga. Ia sei silasila totoa ifo i tulaga ia aua le mea moni e faapena uiga o mea nei o polokiki. E iai foi aiga Minisita e lelei e le faapea o outou, a o le mea ua tuanai ou te taua le vaega lea ua tuanai ona e iai foi Minisita ua le toe tutu mai talu ai lava le fai faapea o latou mea o le faimea faapito. Fai a le atunu lenei e tasi le tatou avega tasi lo tatou faamoemoe tatou te tauto tatou te omai e tautua le atunu o Samoa, o lea ala lea ou te valuvalusia ai aa o le fau ae o le a foi sa outou faafofogaaga i le tulaga lea ia e leai e pei lava ona auvatu o le tuualalo a , a sae ae lava le vaa i luga ao la tatou te iai uma a, ae afai ae o le tulaga foi lea e faapito manu ia tasi ona alofa atu lea.

Lau Afioga i le Fofoga Fetalai o le Maota o tatou, o le Maota lenei e aumai ai mealele tatou te faasoa lelei, ou te manatua e pei lava ona ou taua i le taimi ua fano i le 2006 na matou omai a i le Maota lenei, i le 2007, 2008 ae talanoaina foi e toeaiina o le Maota maimau e pe ana faapei tatou o Papua Niu Kini e maua le tai fia miliona e aumai e sui usufono aua la ia Itumalo, ia e leai se isi e lei manao iai ae na o le faasoasoa a tatou e le lava le tamaoaiga o le ala lea. E le faapea ua ou vivii a tua Laauli lea, faafetai i le agaga na faatu mai ai le manatu lea e le lava le miliona aumai le tai 5miliona poo le tai 10miliona i Itumalo ma le faaaloalo lava.

FOFOGA FETALAI: Malo faafetai, ia se i tulai mai le sui usufono o Sagaga 2.

Susuga Maulolo Tavita Amosa: Lau Afioga e aoga foi lau fesili lea ae se i tau tomanatu lau afioga i le Minisita e fai si ogaoga o le mataupu lea e talanoa ai le mataupu a si o'u uso lea e faalogologo atu iai, ae ui lea lau Afioga i le Minisita faafetai ua manino nisi o mataupu sa ou laga. Ae ua ou tulai atu i le faaiuga lava o la'u lauga faalauaitele, sa ou tautala i le manuia o nei atinae uma i le tatou galulue faatasi. Sa ou taua ai la e lou nei sui le mea lea o le Monitoring and Evaluation. O lea ua maea le vaega muamua o le afa miliona lea ua faamatuu mai, ma o le matou Itumalo ou te iloa e faapena le tele o Itumalo, sa ave le faamuamua i mea ia o Collective Community Programs mea ia o Aoga ma mea ia faapena. E faigofie a la ona fai le Monitoring and Evaluation ma mea faapena.

Ae o le vaega lua lea o le a sau nei ua olioli mai le matou Itumalo o le a talanoa loa i faamanuiaga a aiga taitasi. O lona uiga a le mataalia la le faiga o le mea lea o le monitoring mai e le tatou Ofisa Tutotonu ma le Fono Faavae e iu ina le fua taufuifui le tatou miliona. O le manuia o le faamoemoe lenei o le galulue faatasi ina ia taulau o le faamoemoe. Ia e pei o le ala lea ua ou vave taua lea tulaga ona tele a ina fesuisuiai mai a outou templates, tai pei foi la o le mea lea faatoa ou iloa i le taeao nei o lena sa aumai Lipoti a le matou Itumalo details lelei mai le faaaogaga, a o lea e faimai e leai e iai le

templates lena ua galo ona aumai se i aumai nei e aumai na o le summary lava lea e manaomia. A o lea ua uma ona auvatu le detail Report a matou. Sa ou faapea o mea na e tatau ona fiafia i ai le Komiti Tutotonu ae ui i lea, tapena mai faamolemole se talosaga se tatou Template mautu mo le Monitoring and Evaluation e laugatasia uma ai, faafetai.

FOFOGA FETALAI: Ia se i tulai mai le Sui o Vaimauga Nu 1.

Afioga Sulamanaia Fetaiai Tauiliili Tuivasa: E momoli le agaga o le faafetai lau Afioga i le Fofoga Fetalai mo le saunoaga matagofie i le Afioga i le Minisita. Malo lava e le faigofie le tulaga o le miliona aemaise lava i lau Matagaluega, leaga o lea matau atu o le a see ese, ae sa talanoa le sui lea i mea tau totogi, ae pau lava le faafesili pe e lavevea le toatolu na le lea e i totonu o le Fono Faavae i siitaga ona o e le'o se lilo o lea e pei e lilifa tatou i le Public Services ae pei o le vaega lena sa faatino lava e le tatou Matagaluega ia interviews o le tatalo lea pe mafai ona lavevea le toatolu lea i totonu.

Lua, ua e saunoa i lenei taeao i totogi o Pulenuu ia faafetai a, ae pei o lea e toe auvatu ai foi ma le faafesili e pei e tau faaseā a tamā e pei e manao a tamā ae pe e leai se siitaga mo nai tama o lea ua \$300 uma a, ae e silasila e tele le role a tama e fai i totonu o afioaga e pei e tau faapena le... Ae faafetai i le lilifa ae pe iai se faaopopoga mo tamā o lea e \$300 ae pe faa \$400 tamā ia ae \$350 tinā. Ia ma lou agaga o le faaaloalo lau Afioga i le Minisita. Faafetai lau Afioga i le Fofoga Fetalai.

FOFOGA FETALAI: Ia tulai mai lau Afioga i le Minisita.

Afioga Hon LEOTA LAKI LAMOSITELE: Faafetai mo le avanoa lau Afioga i le Fofoga Fetalai. Ou te fia tali muamua atu lava i le sui lea o Vaimauga Nu 1 ne i te i ua galo lau tali. Na ala ona ou fia vave tali atu ona o lau faaupuga lea e faapea mai e toe ave se isi tupe ma tamā ae tau faalaiti tina o le mea tonu a lena o sauaga ua e suanoa mai ai. O lea la e te fai mai i le ofu uli ae le o faatinoa le mafuaaga e ala ai ona tatou... O le a le mea o le alai ona fai fua lena mea ia. A faapea o lea ua faatulaga mai faapea o le mea lena e tau o le sauaga ona tele ai lava lea o fesili pe aisea ua alai ona faapea.

Afioga Sulamanaia Fetaiai Tauiliili Tuivasa: Lau afioga i le Fofoga Fetalai mo le faasaoina o le taimi o le Minisita. A e silasila i le Tusi Paia o le ulu o le tama ou te le o fai atu foi la e faailoga lanu ae fai atu e faa \$400 tama ae \$350 tina ae o le tama ia e ulu. E pei o le agaga lena e tau fai atu ai lau Afioga e tau faasa'o ai le saunoaga a le afioga i le Minisita.

FOFOGA FETALAI: Ia lau afioga i le Minisita.

Afioga Hon LEOTA LAKI LAMOSITELE: Ia o le a ta le finau leaga o lea ua tatou oo i le Tusi Paia atonu lava e fesoasoani mai le Atua i le vaega lea ma umi ai ma le tatou taimi i i, ae o lea o le a toe faaauau atu se faamatalaga.

Ou te faamalulu atu i lau Afioga i le Faipule mai Sagaga 3 ona e sao oe, ua misi i lau tali le tulaga sa e faaalia ae ou te talitonu foi o lena e te malamalamala lelei i le tulaga o le to'a lea e to'a ai lou Itumalo o lena foi e te silafia la'u talosaga na avatu ia te oe ina ia tatou feiloai ina ia mafai ai ona soalaupule le mataupu lea. Ia ou te le faapea e selu atu ae o lau talosaga a e toe silasila ifo i le tusi mulimuli lea na avatu talu ai nei lava, e le'o faigata lava le agaga ae tatou feiloai, ae a faapea o lou agaga lena e vave lava ona maua lau tupe. E le o i ai foi se agaga e taofi se tupe a se Itumalo ae ou te talitonu a faapea e maea loa ma pasia le tatou tala o le tupe talanoa loa le tatou Itumalo ina ia mafai ai foi ona faauma atu lena vaega ae agai i luma le tatou vaa. Ia e pei o se tatalo atu lea i lau afioga.

O le tali atu foi i le fautuaga na aumai foi e le sui o Sagaga 2, ia faafetai e taua tele le mataupu lea ua e laga i le mea lea o le Monitoring ma le Evaluation, ona o lea faatoa amata ona aoao manogi mai le tatou data. E pei o le Lipoti ia na sau muamua aua o le \$200,000.00 muamua latou ia o le faaaaogaina o le tupe o le Ofisa, ae o le \$425,000.00 lea la a sau nei lea faatoa amata ai loa ona faamaumau e le tatou Ofisa le faagasologa mai i lana framework la ua uma ona faataatia lana Monitoring and Evaluation Framework ae toe la o le faamatalaga e manaomia le aumai i totonu ina ia mafai ai loa ona mataitu ma fai ai iloiloga a le tatou Ofisa i le vaega lea. E pei o se tali atu lea ae faafetai mo le fautuaga e aoga tele mo le faagaoioina o le tatou polokalame.

Susuga Hon Laauli Leuatea Polataivao Fosi: Lau Afioga i le Fofoga Fetalai...

FOFOGA FETALAI: Lau afioga i le Minisita se i tuu atu le avanoa i le afioga i le Minisita o Faatoaga ma Faigafaiva.

Susuga Hon Laauli Leuatea Polataivao Fosi: Na ona fesoasoani atu lava i le Afioga i le Minisita ona o le aafiaga o le Komiti Faafoe lea e i ai le Steering Committee, faaalogologo lelei ma le toto'a i lenei taeao i finagalo o sui mamalu aemaise le sui mamalu mai Sagaga 4. O le mau faavae lea e oo atu i totonu o le Steering Committee e momoli atu lava le tulaga lea o le le paleni o tofiga o Komiti, ma le eseese o manatu o le Taitaifono ma le Sui Taitaifono ma le lautele o le Komiti. Ou te fia faaalia le mataupu lea leaga ua faamavae ese le Sui Taitaifono o la outou Komiti mai la matou Komiti Aoao o le Steering Committee ananafi ona o le mea tonu a lea e te saunoa i ai lau afioga i le Sao Fetalai. O le faaauau i luma o la outou mataupu e lafo

atu i ou aao i lau Afioga i le Taitaifono, tou te soalaupule lelei auala uma o lea e tau faatulaga atu e le Minisita ma lana Matagaluega. E eseese uma a tatou ma auala ma manaoga o Itumalo taitasi o lea e tau faapaleni atu se fuafuaga e laugatasia uma ai fuafuaga, o le Term of Reference po o ni faiga faavae po o ni templates e tuufaatasia uma ai manaoga o Itumalo. Tele itumalo o lea ua mananao mai i taavale hire, mananao mai taavale faatau, mananao mai i masini mananao mai i pasi mananao i loli, a o lea e tau faatulaga atu ona o le tatou miliona muamua lenei. E felefele manaoga o Itumalo lea e taumafai e tuufaatasi i se afuafu e tasi, a o tua atu o lena oka se feainai aemaise lava le tatou nuu Sala. O le omai o Aleisa fai mai latou e le'o paleni le fua o Aleisa ma le mea la e fai i tai i le tatou nuu o Leauvaa e faumalo Leauvaa ia Aleisa. O upu na o lea e oo mai i le Minisita ma le Komiti o lea e tau fofo atu nei, na iu lava ina faamavae aloaia ai le tou Sui Taitaifono ananafi ona o lana talosaga e sili pe a fa'amei ona o ona a'afiaga nei te'i ua maitau mai, o lo'o faimea faapito le komiti ia te ia, ae le fai i le mea amiontonu mo le tatou itumalo. O le ala lea o le talosaga atu ai i le mamalu o sui uma o lo'o saunoa mai, e sa'o outou, ae aumai le avanoa i le Minisita ma le Komiti faafoe, o lea e tau fa'afaoefoe atu, tulaga i le tatou miliona muamua lea. E o'o atu i le tatou miliona lona lua, ua ta'atia le áuivi sao, tatou te folau uma ai. O le fesoasoani atu lena ina ia malamalama, e tofu tatou ma manaoga eseese, felefele, tatou te mananao uma i le mea e tatau ona fai, ae lafo pea le faatuatuaga i le Afioaga i le alii Minisita, ia ma si a matou Komiti lea e tau fesoasoani i ai. Ma le agaga faaaloalo.

FOFOGA FETALAI: Ia, tailo i ai le faafogaga mai a oe le Tama Matua Sa'o Fetalai o lea ua manino ma o tulaga foi ia o mataupu ia o lo o i ai lava le avanoa tou te fesootai ai ma le Minisita, ia ae se i toe tulai mai pe afai e...

Afioga Hon Sala Fata Pinati: Faafetai, faafetai i le avanoa ua tuuina mai e lau Afioga le Fofoga Fetalai. Ia e momoli atu le faafetai i lau Afioga le Minisita o Faatoaga, ia e faapea ona faamalulu atu i le Minisita o Tina ma Tamaitai, o le lagolago pei ona ou fai atu e lima selau pasene i le afe pasene le lagolago, e le o ni upu e aveane ai. E pei lava ona ou tulai faafia atu le Maota lenei, e tasi a le mea na ou sau ai, ou te le i sau e saili au, na ou sau e fai le tautua aua le atunu o Samoa, faamaoni mea lelei, mea silisili, o i ina e saili ai tatou. O le tofi foi lea ia tatou, e le o ni tatou tofi, o le finagalo o e o lo o faapea ona aumai le latou talitonuga, o le sui lea e aga e tatau mo i tatou, fai la i ai le mea lelei, fai le mea silisili, ona e umi lea ona e nofo mai i le nofoa. E le nofonofo umi na ou nofo atu, lea ua savali le 20. Aisea? O le Atua lea, a le Atua lele, le Atua e limataitaiina, tate sulufai i ai, tiga na laveaia tatou i puapuaga, le paía o le Maota le Aiga Minisita ma Minisita Lagolago. Faafetai, e le teena lou tagata nei le tou saofafai mai ina, faafetai. O le finagalo lea o le Atua, fai le finagalo o le Atua, ae ia tatou faamuamua le

atunuu. E leai se agaga o au e fai ai se mea e faaleaga ai Aleisa, o Aleisa pei na ou fai atu, se i tulou a le gagana, na fetosoai faapautolo, se i tulou a. Ae a? Na ou talia, aua ua oo i le taimi mulimuli e le iloa po o ai se isi e manao ia Aleisa, ioe, ou faapea atu le Minisita, lelei aumai Aleisa. E ui a ina tiga ma faigata, aua o le mea moni, e le na ma le laina, a oo ina saofafai le matou nuu, e leai se upu a Aleisa, e le mafai na omai Aleisa fono ma Leauvaa. Aisea? O Satuala. O le a le faasinomaga o Aleisa? Talofa. A o le agaga moni a ia, ana avatu le seleni se miliona, o le a le mea e le vae tutusa ai pe afai o lea? E fua i fuainumera, tele naua le fuainumera o tagata palota a lo matou nuu o Leauvaa, o se nuu lea sa ou faapea na o Leauvaa e fai lana palota. Ia ae peitai ane, ua usitaia lava le tulaga pei ona i ai.

Lau Afioga i le Palemia ma le Aiga Minisita, fai o lea. Matou te malilie o le a lava le mea e oo ai le tou faasoa, ia e fai a o le ala le tautua o le pule a na ia te outou, ma te faia a mea silisili e tautua aí le finagalo o le atunuu, ma lo matou itumalo. Soifua ma ia manuia. Faafetai mo le avanoa.

FOFOGA FETALAI: Ia malo saunoa, se i tulai mai lau Afioga i le Minisita.

Afioga Hon LEOTA LAKI LAMOSITELE: Ia faamalo faafetai i lau Afioga e tusa ai foi ma le faamatalaga ma le faamalosi'au mai le tatou mataupu, ma e talitonu, o le a fesoasoani mai le Atua, ina ia tatou galulue ina ia maua se to'a ma filemu mo le faaalu i luma o le tatou mataupu o lo o loma nei.

Ia ona ou oo mai lea i le Ofisa o Fuainumera Faamauina, i lona aotelega e le i maua ai ni fesili tuusao i galuega ma matafaioi a le Ofisa Fuainumera, seíavagana ai faamaumauga ma faailoilo o le tamaoaiga ma le soifuaga lautele pei ona aofia i saunoaga a sui usufono mamalu, ma o le matafaioi foi lea e patino i le fuainumera faamauina. O nisi ia o faailoilo e aofia ai, muamua, tulaga siitia o le tau o oloa, inflation, e aofia ai foi fua o faaeleeleaga i totonu lava o le atunuu. E pei ona malie i finagalo o sui usufono mamalu , o fesuiaiga o tau o oloa e pei ona faamauina i lenei lava vaitau o le soifuaga, o gasologa masani a ia o tulaga o fefaatauaiga o oloa ma auaunaga. A oo ina utiuti oloa e maua i le maketi ona siitia lea o latou tau, e pei ona faamauina nai masina ua tuanai atu aemaise lava i le mataiai o le atunuu o le talo. O le faataitaiga lena. Peitai i lea lava foi vaitau na faamauina ai le siitia o talo faatauina atu i atunu mamao, tusa lea ma le 38% pea a faapea i le faaiuga o Mati 2023 faatusatusa ia Mati 2022.

Lau Afioga i le Fofoga Fetalai ma le mamalu o le maota, o le natura lea o faafetauaiga o oloa ma auaunaga , ma e le gata i Samoa nei ae faapea foi i atunu uma o le lalolagi. Ae i ai le taofi o le measili ona taua o lea lava e gafataulimaina ona faalauiloa faailoilo i taimi vave ma talafeagai ina ia

mafai ona saili se fofo e ala i le tapenaina o ni taiala ma faaiuga fai mo le foia o nei faafitauli.

E pei ona i ai le faafesooaiga a le tatou Palemene, aemaise foi o le Malo ma le Vaega Tumaoti. Ua le gata i lea i lau Afioga i le Fofoga Fetalai a o le tele o isi faailoilo e aofia ai le fua o le tamaoaiga poo le GDP, ma le anoanoai o nisi faailoilo o le soifuaga lautele ua mafai ona maua. E faailoa atu ai i sui mamalu o le Palemene o lenei lipoti e pei ona saunoa iai sui mamalu o loo mafai ona tufatufaina atu i le atunu, ma o loo faapea foi ona faailoa i upegatafailagi a le Ofisa o Fuainumera.

E le gata i lea ae fia faamauina foi le sao tele o le au tusitala leitio ma televise i le lipotia ma le faalauiolina o nei faailoilo mo le silafia e le atunu lautele aemaise o a tatou paaga mai fafo. E i ai foi le talitonuga o le ala lagalaga lea o finagalo o le tele o sui mamalu ona ua mautu ma ua maua avanoa i nei lipoti.

Lau Afioga i le Fofoga Fetalai ma le mamalu o le Maota, e i ai le talitonuga o galuega ma matafaioi o le tatou tiute faaaauau, taumafaiga ina ia faatumau ma faaleleia atili tautua ma auaunaga mo le manuia o Samoa ma ona tagata. E faapena foi le auaunaga a le Fuainumera Faamaumauina. E i ai le talitonuga a lelei atoatoa ma faatuatuaina fuainumera faamauina ma faailoilo o le tamaoaiga ma le soifua lautele o tagata, o le a mautinoa foi le ola fiafia ma le ola manuia o tatou tagata.

E faailoa atu foi i sui mamalu o le Palemene nisi o atinae tetele o lo o faaaauau ma ua fuafua e faatino lo tatou Ofisa i totonu o le tausaga faaletupe 2023/2023 ma nai tausaga lumanai, ina ia saga faalelei ai lenei auaunaga .

O le mea muamua, Pepa faamaonia aloaia faatekonolosi o Samoa ua silafia e le mamalu o le Palemene lenei faamoemoe taua mo le atunu ma o loo faagasolo faatalatalanoaga o le Tulafono Tau Faaofi i le Maota. E i ai le faamoemoe a taunu manuia lenei atinae o le a tele lona sao i le atinae o fuainumera faamauina ae faapea foi le faaleleia atili o le ofoina o le tele o nisi o auaunaga i le atunu, e aofia uma ai le Malo ma Vaega o Pisinisi Tumaoti. O lenei galuega o loo aofia ai ma galuega faalelei atili a le lesitalaga o pepa fanau , tagata maliliu, faaipoipoga ma Vaega Tama faaletulafono.

Lona lua, Suesuega o Tupe Maua ma Tupe Faaalu a Aiga taitasi 2023. O se tasi lenei o duesuega taua e aoina ai fuainumera faavae benchmark information, faaleleia atili ai le tele o faailoilo o le tamaoaiga. E aofia ai GD, fesuaiga o le tau o oloa (inflation) ae faapea foi ona mafai ai ona tuufatasia le iloiloga auiliili le tulaga o le mativa ma le le tagolima, e pei ona avea ma se tasi o faailoilo taua i le Taiala o le Lumanai o Samoa 2022/2023 agai i le 2026 aemaise o le taiala o le manulauti o atinae gafataulimaina 2023.

Lau Afioga i le Fofoga Fetalai e faailoa atu ua maea tapena lomiga o faamaumauga o Itumalo taitasi o le atunu lea e faapea o village profiles, tuufatasia ma faamaumauga na aoina mai le Tusigaigoa o le 2021 ma ua

tufatufaina atu i Ofisa o Fono Faavae o Itumalo. Ua avanoa foi le Ofisa o Fuainumera mo ni faatalatalanoaga e faamalamalama atili ai nei faamaumauga i taimi e talafeagai ai ma lo outou paia.

E taua foi mo le silafia e le Palemene mamalu o lenei galuega ua faagasolo e pei ona sa amata mai i le motu i Savaii i le vайaso lea na tea nei ma o loo faaauau ai i le Motu o Upolu i le vайaso nei. E i ai le manatu ua faailoa nisi ia o galuega faagasolo, ina ia le gata mo le silafia o le Maota ae faapea foi le atunu lautele ona e pei ona molimauina o nisi o ia galuega o lo o savalia ai Maota ma Laoa o le atunu ma le aoina mai o faamaumauga ina ia amanaia ane e le atunu.

Lau Afioga i le Fofoga Fetalai ma le mamalu o le Maota o nisi na o galuega ma le anoanoai o nisi o galuega o lo o soosootauau ai le Ofisa o Fuainumera ma Matagaluega ma Faalapotopotoga a le Malo, aemaise le Vaega o Pisinisi Tumaoti ma a tatou Paaga mai fafo i lona faatinoga.

O ia galuega mo le silafia o lo o limataitaia lava i atinae ma galuega faatulaga i totonu o taiala o fuainumera faamauina 2022/2026 e pei ona pasi aloaia i le faaiuga o le tausaga o le 2022 ma o lo o mulimilitai lava i taiala aoaotetele e aofia ai le PDS 2023 agai le 2026.

Lau Afioga i le Fofoga Fetalai o le Maota, lau Afioga i le Tamaitai Palemia, le afifio le Aiga Kapaneta ma le mamalu o le Palemene o Samoa. E i ai le faamoemoe ua o'oo'o atu se tali atu i finagalo e pei ona saunoa i ai sui mamalu o le Palemene e uiga i lenei Tulafono. Ae afai foi ua le atoa, e talitonu e fale i le fale o le Atua lo outou finagalo.

Avea foi lenei avanoa e toe faafetai atu ai Ofisa Sili o Pulega e lua, o lo o i lalo o lau taitaiga faapea foi le aufaigaluega mo latou galuega lelei o lo o faatino i ia Matagaluega mai lenei tausaga o lea tau faaiuiu.

Ia, e toe momoli atu le faafetai i le tapuaiga a si ou Itumalo faapea foi ona... aemaise lava si o matou Itumalo. Faafetai atu i le taliaina o le valaaulia o le tatou Malo i le Tutoatasi, sa tatou faafafia ai ona o se taimi muamua lea ua amanaia ai foi si o tatou Itumalo i lenei valaau. Faafetai atu ai foi i le Malo aemaise le Komiti sa tapenaina lenei faamoemoe. Faamanuia le Atua aemaise i Tapaaau e fa ma tootoo e fa, aua le aufaigaluega totofi a le Atua o lo o nofo tatalo aua se manuia o Samoa. Soifua ma ia manuia.

FOFOGA FETALAI: Ua faamalo saunoa i lau Afioga i le Minisita o Tina ma Tamaitai aemaise foi o Atinae o Afioaga ma Agafesootai aemaise foi le Ofisa o Fuainumera Faamaumaolina, Malo faafetai lau Afioga e tusa foi o le taliina foi o nisi o finagalo o le Maota , aemaise foi ua matau atu aemaise o Faiga Faavae aua le agai luma o Matagaluega. O le mea lea malo faafetai. O lena foi ua taatia atu fautuaga a nisi o sui mamalu o le Maota aua lava le tatou miliona ina ia faapena ona maua se fesoasoani mo nai o tatou Itumalo.

O le mea lea malo faafetai mo le saunoaga, ua oo mai le tatou faasologa i lau Afioga i le Minisita o Leoleo ma Falepuipui faapea foi le Komesina o Faiga Palota, lau Afioga i le Minisita.

Afioga Hon FAUALO HARRY JEFFREY SCHUSTER (Minisita mo Leoleo ma Falepuipui, Auaunaga Tau Tinei Mu ma Faalavelave Tutupu Faafuasei): Faafetai lau Afioga i le Fofoga Fatalai mo le avanoa. Afio lau Afioga i le Fofoga Fatalai, afio foi le Afioga i le Tamaitai Palemia, Sui Palemia, mamalu o le Kapaneta, Minisita Lagolago. Afio foi le Afioga i le Taitai o le Itu Agai ma le mamalu o sui mamalu o lena Itu o le Malu.

Afio foi lau Afioga i le Aao Tusitusi o le Maota faapea le mamalu o le Aufaigaluega, le mamalu o Ofisa Sili o Pulega o Matagaluega a le Malo ma Faalapotopotoga Tumaoti a le Malo ua tatou faatasi.

E faatalofa atu foi i le tapuaiga a le mamalu o si o tatou atunu, mamalu faalemalo, mamalu faale-Ekalesia, mamalu faaleaganuu. E tulai atu ma le faaaloalo mo se tali atu foi ni fesili na afea i saunoaga a sui mamalu o le Maota.

Lau Afioga i le Fofoga Fatalai, o le agaga o le faafetai, vivii le loto i le Alii. Faafetai mo lenei taeao, faafetai i Lona agaalofa ma Lona agalelei, tatou feiloai i le saogalemu ma le fiafia i lenei taeao.

E momoli foi le faafetai i si ou uso a sui usufono mo Vaimauga 3, faamalo faafetai mo le saunoaga faataupou matagofie. E momoli atu foi le faafetai i lau Afioga i le Minista o Tupe mo Tupe ua atofaina mo Matagaluega e 3 o lo o ou auauna ai, Matagaluega o Leoleo Falepuipui ma le Ola Toefuataiga, Matagaluega o le Tineimu ma le Uluai Laveai o Faalavelave Faafuasei, ia faapea foi le Komisi o Faiga Palota.

Faafetai atu foi i le mamalu o le Aufaigaluega a le Matagaluega o Tupe ma Matagaluega a le Malo i le faamaopopoina foi o le Tala o le Tupe. E momoli atu foi le faafetai tele lava i finagalo uma o sui mamalu na faaalia i le tatou Fono le talanoaina o le Tala o le Tupe. Faafetai mo manatu uma e aoga e alualu ai i luma le tatou auaunaga, o le tatou taumafai lea ia maua se lelei mo Samoa uma.

Lau Afioga i le Fofoga Fatalai e 16 sui mamalu sa afea le Matagaluega a Leoleo ma Matagaluega o lo o ou galue ai. O le sui usufono o Palauli 3 sa ia afea le tulaga i le totogi o leoleo, le fia siitia o le totogi o leoleo ma e i ai foi isi sui o le sui o Safata 2, Sui o le Vaimauga 1 sa afea foi le tulaga lea. I le taimi lenei o lo o faavasega e le Matagaluega ia totogi o le Matagaluega ona o lo o iai se tulaga i le eseesege o totogi o le Matagaluega o Leoleo ma le Falepuipui ma le Ola Toefuataiga.

E maualuga atu le totogi o e o lo o i le auaunaga a le Falepuipui nai lo o Leoleo i lalo mai o le rank lea o le assistant commissioner ma o loo fai ai se iloiloga ona maea lea ona tuu atu lea i le tatou vaega lea o lo o vaaia totogi

o le Malo, mo se latou foi tagatagai ona e le gata i leoleo ae faapea foi isi auaunaga e tatau ona tilotilo latou i ai.

Ia, o le sui o Aleipata Itupa i Luga sa afea le tulaga i fualaau faasaina o le a taatia le fualaau faasaina se i oo atu ai i se taimi mulimuli ane. Ae faamauina lou finagalo i le tulaga lea aua e tele foi isi sui sa laga le tulaga lea.

Le sui o Vaisigano 1 sa laga le matapu lea le tele o tamaiti leiloloa o le galuega a leoleo i le tulaga lea o le sueina ae i le Tulafono a ia soiltulafono soo se matua poo se isi o i lalo lana vaavaaiga se tamaititi pepe se i oo atu i le 16 tausaga e tatau ona e faaaoga ma tausi le tamaititi i tulaga uma, faalavalava mafafaga ma le puipuiga. A faapea la o tamaiti ia e leiloloa, o matua la ma e o lo o vaavaaia ia tamaiti o le latou matafaioi lea e tatau ona tausisi i lo latou tiute.

Le sui o Vaimauga 1. Faafetai mo le faailoaina mai o lea foi ua faamauina na faailoa mai e le Matagaluega e sao le saunoaga o lo o i ai se fanua faaataata mo se Fuimu ma se Ofisa o Leoleo i le tatou Vaimauga 1.

O le sui usufono o le Vaa o Fonoti sa e laga le tulaga lea i fualaau faasaina, mulimuli ane oo atu i ai se faamatalaga. O Faleata 4 o le tulaga foi lea i fualaau faasaina e oo atu foi i ai se faamatalaga pe a oo i le taimi e talanoaina ai. Ae faamauina ma le agaga fiafia lau saunoaga i le tulaga lea, e tele lava le fesoasoani e maua mai alii ma faipule mo leoleo i le taumafai lea e titina le mea lenei o Fualaau faasaina. O le faaupuga e faapea e malu le Malo i alii ma tamaitai o le Ofisa o Leoleo. A o le aotelega, e malu Samoa atoa i alii ma faipule, ma e lagolagoina le manatu e tele lava le avanoa e faigaluega ai alii ma faipule ma alii ma tamaitai o malu o le Malo o le tatou taumafai e titina le ogaoga o le mea lenei o Fualaau faasaina.

O le sui usufono o Siumu sa laga le tulaga lea i se fomai faapitoa foi lea e suesueina tino maliu. E faamaonia le saunoaga, ma o lo o i ai tatou tamaiti sikolasipi na o e koleni. Ia e pei lava o lenei olaga, na alu atu le tamaititi aoga i le mea lea, e uma ifo ua sui le mafaufau, ua fia fomai i le isi vaega e faaaoga i ai le tomai ua maua, ae ua le toe manao e sau e fomai e suesue le mafauaaga o le maliu o se tagata.

O le taimi nei o lo o faatalanoa ma leoleo a Fiti. E feoloolo le toatele o a latou fomai faapea la e i ai, o lo o i ai foi le avanoa e mafai ai ona omai e faigaluega tumau i inei i Samoa. Ma o se tulaga lea o lo o tilotilo i ai le Matagaluega i le aumai faapitoa e le Matagaluega oLeoleo se latou fomai faapitoa mai Fiti ae le toe faamoemoe i le falemai mo le aumaia o se fomai e suesueina le mafuaaga o maliu.

O Faleata 1, ua faamauina lau Afioa le talosaga e manaomia se leoleo i ina i le magafa i Vaimoso ona o le pisi ma e tulai mai e ono tele ni faalavelave tutupu mai ai. Ua faamaonia le tulaga lea, e i ai se taeao na ou ui mai ai le auala lena, e matauliaina o tagata ia mai fafo e le malamalamalama foi lea ia tatou e le mafai ona e toe afe i le itu taumatau pe a e oo mai i moli ia e i le magafa.

E tatau ona e ui i le auala la e i St Marys. Ae ou te alu atu i le taeao lea ae sau le taavale rental ua poloka uma ai taavale. Ua taufai tete uma tagata i le tagata lea mai fafo, ae ua le iloa foi e si tagata lea po o le a le mea o le a fai. E faamaonia le tulaga lea lau Afioga.

O le sui usufono mai Vaimauga 2, e faamaonia foi le tulaga lea i le magatolu lea i Magiagi, o la e ua faaoo atu i le Komesina le talosaga i se leoleo foi e vaaia le magatolu lea i taimi o le taeao. E faamauina foi e sao lelei le manatuna e faaalia. O le toatele o avetaavale e le malamalama po o le tagata e alu sao le taavale o le tagata lea e ae mai lalo o le aega. A e fia afe la i Magiagi, e tutu uma lava taavale ia e sau mai Samoa College ma le itu agavale ae alu atu le taavale lea e i lalo o le aega. A o le tele o isi taimi, e sau lava le taavale lea mai Magiagi ma le sau mai le Kolisi ua le tilotilo o la e tu ai le laina foi lea e tatau ona e tu. E leai se mea o se alualulemu ma alu ai lava. O le tulaga foi lea e aoga ai se leoleo e tilotilo e faamalosia le Tulafono i lea tulaga.

O le sui usufono mo Sagaga 4, ia faafetai ua faamauina le talosaga mo se Ofisa o Leoleo e faaopoopo atu i le Ofisa i Tuanaimato mo Falelauniu po o Nuufou ona o ni eseesegea foi na tulai mai i ina. O le a taatia atu i le Komesina o leoleo ma le Matagaluega latou te tilotilo i lea tulaga pe mafai ona fai.

O le sui usufono mo Gagaemauga 2, ua faamauina lau talosaga e sii le totogi o le faamamaina o le fanua o le Ofisa o le Matagaluega a Leoleo i Fagamalo mai le \$800 i le \$1000. Ia, ana ia te au le malosiaga e fai ai le mea lea, e fai lava nei, a o lea o le a ave i le Komesina ma le Matagaluega o Tupe e tilotilo latou i ai i lau talosaga.

O le sui usufono o Safata 1 sa laga le fesili po o ai e ona le laisene o fana ma ututau sa taofia i le aumaiga i tatonu i le atunuu, ma na te fia iloa foi po o le a le aofai o fana ma ututau. Ia e le o se mataupu fou, o le mataupu ua leva foi ona tagai ma silasila i ai le mamalu o le atunuu i totonu o le pepa. O le ona le laisene na aumaia fana ia i totonu o le atunuu, o le alo o le Afioga ia Laaulialemalietoa. O le mataupu lenei i le tausaga e 2012, sa faamatuu atu ai e le Minisita o Leoleo i lena vaitaimi le Komesina o Leoleo le laisene ia Laauli e mafai ai ona ia aumaia fana ma ututau mai atunuu i fafo ona toe faatauina atu lea i le mamalu o le atunuu. Ina ua oo mai la i le tausaga 2021, tauala mai le Matagaluega, na aumai ai se talosaga ia te au, o le talosaga a Laauli, e manao e faamatuu ese atu ia ia le laisene, ae ave le laisene i lona atalii. Sa fai tulaga masani, e tuuina atu i le Matagaluega e o e tagai i ala o le Tulafono pe agavaa le alo o Laauli e ave i ai le laisene lea. Ma ina ua maea ona fai le lipoti ona toe oo mai lea o le lipoti ia te au ua uma ona fai le suega, o lo o tele le malamalama ua ausia foi manaoga o le Tulafono, e tatau ona e ausia faatoa avatu lea o se laisene ia oe e te faatauina mai ai ni laau malosi ma ni pulu mo laau malosi. Ma o lea la sa ou sainia ai le laisene lea e avatu i le alo lea o Laauli o James le laisene lea e faatauina mai ai fana e faataga i totonu o le atunuu faapea ma ututau.

O le aofai la o fana ia na faatau mai, e 21 fana foi lea 12 - 12 Gauge, e 4,750 pulu, e tutusa lea ma le 198 pusa ututau ona o le fana lea o le 12 e tai 24 ututau i totonu o le pusa e tasi. O Rifles 22 Gallagher, e 30 fana ae 10,000 pulu e tutusa lea ma le 200 pusa ututau aua e tai 50 pulu i totonu o le pusa 22 e tasi. Ia, e limataitaina lava le tuuina atu o laisene e lua ituaiga laisene, o le laisene e mafai ai ona e faatauina mai fana faatau i le atunu ma pulu, ma le laisene e mafai ai e se tagata ona talosaga mo se fana. Ma o le Tulafono o lo o manino, o le tagata e i ai le malosiaga faaletulafono e ave ai le laisene lea, o le Minisita o Leoleo ma le Komesina o Leoleo. Ma o puipuiga lava o lo o i totonu o le Tulafono. E le mafai ona avatu se laisene pe laisene faatau po o le laisene e te faaaogaina, vagana ua e ausia manaoga o le Tulafono. Ia mama lou suafa, e le i molia oe i se solitulafono e 5 tausaga se sala faafalepuipui, ma e mama foi lou suafa o oe o se tagata e talafeagai le avatu ai o le laisene. Ma i totonu o le Tulafono, e 2 tagata lea e mafai ona ave i ai le... so o se faipisinisi e ausia agavaa ia, e mafai ona avatu i ai le laisene e faatau ai fana. Ae mo e manao e faatau fana, na o le 2 ituaiga tagata lea e mafai ona ave i ai, o se faifaatoaga o e manaomia le laaumalosi e faalalo ai au manupapalagi po ua faatamaia lau faatoaga ua ai e meaituaolo. A faapea la e te le pau i lalo o vaega ia e lua, e le avatua se laisene fana ia te oe. Ma o le faamalamalamaga lena o le tulaga lea.

O le saogalemu foi lava o le Tulafono, e mafai ona avatu le laisene pisinisi po o le laisene ia oe o i ai sau laaumalosi. Ae tumau i le Minisita ma le Komesina o Leoleo le malosiaga, e i ai loa se sasi e faaaaoga ai, se'i ese loa ma le laisene i le puipuiga foi la o le Tulafono, a avatu le laisene e te faatauina ai fana ma ututau, e manaomia ia oe le i ai o le resitala i taimi uma e faamauina ai le aofai o fana ma ututau na e aumaia mai fafo ma le aofai na e faatauina atu i tagata o le atunu. E le mafai ona e faatauina atu se ututau po o se fana i se tagata e leai se laisene. A faapea la e te manao i se pulu po o se ututau, e te alu ma lau laisene pe a faapea o oe o se faifaatoaga po o oe o se tagata foi lea e te i ai i le taalogia lea o le fanafana, e te alu ma lou laisene lea e faaali i pisinisi ia e faatau ai pulu ma fana, faatoa mafai ona faatau mai ia te oe. Mai lea taimi i lea taimi, e taamilo le vaega o le Matagaluega lea e vaaia mea ia, e siaki uma lava o la e talafeagai le aofai na e aumaia ma le aofai o pulu ma fana lea e i totonu o le faleoloa. Ma o le puipuiga lena o le Tulafono, a i ai loa se faaletonu e maua atu e le Matagaluega, o i ina loa e i ai le malosiaga o le Komesina ma le Minisita o Leoleo e se'i ai le laisene.

A o le isi tulaga sa laga e lau Afioga i le sui usufono o Safata 1, o si alo lea na maliu i se faalavelave tau taavale, o la e pisa foi lea e le i maua se isi e...

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita se i tuu atu le avanoa i le sui usufono sa laga... Se i tulai mai le sui usufono mo Safata 1.

Afioga Leaana Ronnie Posini: Faafetai tele lava i lau Afioga i le Fofoga Fetalai. Faafetai tele lava i lau Afioga i le Minisita mo le faamalamalamaina o le mea lea tau laau malosi. O lea ua manino, ae matou te le aumaia foi ni tala o upegatafailagi e aumai totonu o le Maota. A o lea ua saunoa sao lava lau Afioga i mea moni o lea na aumai fana, o lea foi ua matau le Maota, ia e 51 fana ia na aumai totonu o le tatou atunuu. E talitonu foi la o lea ua manino, ma ututau ma mea na. A o le fesili foi lea na ou fesili ai, o lea foi ua e faamalamalama i le mafuaaga na ala ai ona ave le laisene i le tulaga o lea ua taua le alo o le Afioga i le Minisita. O lea ua ave i ai. E pei o lea sa tau matau, pe aafia ai le matua o le soifua e ave i ai le laisene. Ae manatua foi lau Afioga, sa ou fesili foi lea faapea e 4 kamupani lea e latou te aumaia le laaumalosi. O lou la tau matau, o le mea foi lea o le laaumalosi, e le o se oloa e taulia e manaomia e le tatou atunuu i aso uma aso uma ma tausaga uma. E i ai foi lo matou iloa, o le faaaaogaina o le mea lea o le laaumalosi, e oo i le 30 i le 40 tausaga o faaaaoga laaumalosi. E i ai la lou talitonuga...

FOFOGA FETALAI: O lea ua maua le finagalo o le sui usufono.

Afioga Leaana Ronnie Posini: Pe o le a se silasila. A toe apalai foi la se isi i lea pisinisi, o lona uiga foi a maua lava la aiaiga o le Tulafono ma requirements ia tou te taua, e toe allow foi se isi e toe aumaia. A o lau matau e le toatele le tatou atunuu na o le aufaifaatoaga. E pei o le agaga lena ua ou tulai atu ai lau Afioga i le Minisita.

FOFOGA FETALAI: Ia, o lea ua maua atu le finagalo o le sui usufono. A faafogafoga lelei lava i le saunoaga a le Minisita, ua auilili uma mea uma o le Tulafono ma le malosiaga. Ou te talitonu foi o lea ua saunoa manino le Minisita i tulaga uma lava o le Tulafono aemaise foi o latou o lo o... ona agavaa, ia o lea ua manino lava. Ae talitonu e leai lava se mea o faanenefua i le saunoaga a le Minisita... O le mea lea, malie le sui usufono o lea ua saunoa manino le Minisita. Lau Afioga i le Minisita pe toe i ai se isi mea e toe faaopoopo.

Afioga FAUALO HARRY JEFFREY SCHUSTER: Faafetai lau Afioga i le Fofoga Fetalai. E limataitaiina lava le galuega a le Minisita ma le Komesina i ala o le Tulafono. Ua manino le faataatiaga o le Tulafono i le mea e tilotilo i ai, ma o le malosiaga, o le malosiaga a le Minisita ma le Komesina.

O le tulaga e pei ona ou fai atu, e leai se tapulaa pau le mea ia agavaa le tagata. I le Tulafono e 21 loa tausaga o le tagata ua mafai ona e fai pisinisi, o le Tulafono lena ma po o le a lava le laititi o le tagata, tatou te tilotilo o le Tulafono lava. E le gata o le Tulafono na fai a o le aiatatau a le tagata i lalo o le Tulafono. E sao o le mea lea o pulufana ma laaumalosi o le pisinisi ma

so o se isi foi la e talosaga mai, agavaa lava i le mea o lo o faataatia mai e le Tulafono e leai se aulape o taatia mai i le Tulafono e faasa ai. Ae a aumai la le talosaga ae e faiatu leai, i lou malamalama ua lava le fa pisinisi ona sau lea o le tagata lea ave au i o i le falepaepae fai le Faamasinoga. O fea e aumai ai le malosiaga o le Minisita e faimai ai e fa ae lei faimai le Palemene i se mea faapena. Ia pei o le agaga lena lau Afioga, manino a ala o le Tulafono e amanaia foi e le matagaluega aiatatau a tagata i le tulaga lea.

Lau Afioga i le Fofoga Fetalai o le isi la fesili na laga, o le...

Afioga Leaana Ronnie Posini: Lau Afioga i le Fofoga Fetalai...

FOFOGA FETALAI: Ia, ou te leiloa po o le a le mea lea e te tau faimai ai, o lea ua matua manino a le saunoaga a le Minisita. E tau ese le agaga lea ou te tau matau atu i lau Afioga i le Sui mamalu a o lea ua saunoa manino le Minisita i ala o le Tulafono. O le mea lava ua iai le Tulafono, o le Tulafono foi ua leva e le o se Tulafono fou nei o le Tulafono ua leva ia ae ou te leiloa po o le a le mea lea e te toe tau faimai ai. Sei toe tulai mai la po o le a le mea lena e te tau faimai ai.

Afioga Leaana Ronnie Posini: Ia faafetai tele a i lau Afioga i le Fofoga Fetalai, o le ala lea, pau a o lea o le faamau i lalo o lau fautuaga ma lau tuualalo. E mamafa lou mafaufau i le saogalemu lea foi e tupu i le tatou Atunuu ua faaaaoga sese ia fana ua le faaaaoga i faatoaga ia ae ua toe faaaaoga i tagata ma le agaga faaaloalo.

FOFOGA FETALAI: Ia lea ua faamauina e le Afioga i le Minisita, ia lau Afioga i le Minisita faaaauau mai le saunoaga.

Afioga Hon FAUALO HARRY JEFFREY SCHUSTER: Faafetai lau Afioga ia faamauina le finagalo o le Sui a Faipule ia ae le na o laaumalosi o lo o faaaaoga e feoti ai tagata i soligatulafono. O laau, maa ma lima lea ua faamaonia mo solitulafono foi lea Murder, ia ae ui i lea lau Afioga o le a se'e atu. Na fesiligia foi e le Sui o Safata Nu.1 le tulaga lea i le maliu foi o se tasi o alo lea e oo mai le taimi lenei e lei maua po o ai se isi na faatinoina le tulaga lea. Lau Afioga i le Fofoga Fetalai o lo o tatala le faila a le Matagaluega o Leoleo e lei tapunia ona e lei maua ni mau anoa. O le matagaluega foi o leoleo e limataitaiina a i le Tulafono faatoa mafai a ona molia se tagata pe a faapea ua iai ni mau anoa e mafai ona lagolago ai ni moliaga. E le mafai ona soona molia se isi i ni masalosaloga ana faataga i le Tulafono ona molia tatou i ni masalosaloga ua tatou falepuipui uma a. O le mea la lea la e tatala le faila a Leoleo, pau a le auala e maua ai e Leoleo se avanoa e molia ai se tagata o le omai a o ni molimau oatu i Leoleo faapea, o au na iai le mea lea ma o le mea le ana tupu na ou vaai iai. Po o le isi foi a

mau foi lea i se avetaavale faimai, na aveatu le taavale lea fai ia te au la e iai tulaga ia, o ituaiga mau la na lea e manaomia e le matagaluega. A aunoa la ma ni mau anoa faapena, o lo o tatala le faila a Leoleo e le mafai ona tapuni e le o mautinoa. Ae o le tulaga lena o lo o iai le tulaga lea ma ou te lagona le tiga o le aiga lea i le Tama ma le Tina e oo uma a ia tatou, a tupu se mea faapea ae lei tapunia e tau te feoai a ma le tiga ma e malamalama iai i le tulaga o lo o iai, ia ae o le tulaga lea o lo o iai le mataupu lea lau Afioga i le Fofoga Fatalai.

Le Afioga i le Sui mo Falealili 2 ia o lau talosaga mo se auaunaga tineimu i lou Itumalo, ia o iai a le tapenaga foi a le matagaluega o lo o tilotilo foi i le tulaga lea. Ua iai le fuafuaga mo le fale tineimu mo Aleipata Itupa i Luga mo le Atu Aleipata ia a o lea la e tele foi le va mai Aleipata i Falealili. O lea ou te iloa sa laga e le Komesina o Tineimu e tatau ona iai se fale tineimu mo Falealili. Ia o le a tilotilo iai ma sue se tupe e faatino ai le faammoemoe ae o se tulaga o la e silafia e le Komesina ma le matagaluega lau Afioga.

Le Sui mo le Aiga i le Tai ia faamauina le tulaga i le auaunaga a Leoleo mo le saogalemu lautele, ae faamaonia foi le tulaga na e laga i auala foi ia a tatou aemaise a le auala lea e alu atu i Malifa alu tau i le malae vaalele. Ia le alu atu lea i Malifa i o i Vaitele i faleoloa ou te iloa o le tele o tatou ua tatou vaai ai i taeao o Aso Toanai oatu a taavale paka i le zone foi lea e maka, paka le taavale iina ae faaemoemo ia hazard lights ae tamoe le avetaavale e fai le faatau. Ia ua faamauina lau Afioga le tulaga lea ma o le a logo foi le matagaluega a leoleo i tiute o aso ia aemaise a le weekend e amata ona faasala e faia le tulaga lea ona e le faataga le tulaga lea. O le mafuaaga sa vali ai iina o le faaaoga e tagata ia e liliu e alu agai i le isi itu o le auala ia sefe le tu ai iina e faatali le liliu ae ia feoai pea taavale.

O le Sui o Satupaitea ia o le fesili mo maua ma le Afioga i le Minisita o Faamsinoga poo afea e aveifo ai le auaunaga i Salelologa. Ia o lo o faamauina ia le fuafuaga e faamei le taulaga i Salelologa e aveatu foi iai ma auaunaga a Leoleo. O lo o tumau le faamoemoe lea i fuafuaga a le matagaluega a Leoleo e faase'e atu i Salelologa ia le faleautu o le matagaluega a Leoleo mai Tuasivi.

O le fesili a le Afioga i le sui usufono o Aana Nu.2 i le taimi nei i le leai o se tatou vaa poo faafefea ona puipuia ia le tatou gataifale. O le taimi nei o lo o galulue ma isi Malo ia Niu Sila, Ausetalia ma Amerika foi i le tau puipuiga o tatou ogasami ia latou vaa e omai agai iai. Sa omai foi lata mai nei vaalele e lua, o le vaalele a Amerika ma le vaalele a Ausetalia sa tilotilo i le tulaga lea i le ogasami a tatou ma tatou tuaoi ma isi atunu ma sa latou faamauina ai foi la le tulaga o vaa ia sa feoai i totonu o le tatou ogasami.

O lea ua iai nei le vaa mai le Malo Iapani ae o lo o faatali le tatou vaa lea aumai Ausetalia e sui ai le Nafanua lea na paulia e aumai ia Ianuari o le tausaga fou. O le taimi nei foi o lo o faaaoga se vaa a se tasi o Tamalii i inei

Samoa o lo o lisiina e Leoleo e faatino ai le tulaga lea ae lei taunu mai le tatou vaa.

O le sui usufono o Safata Nu.2 ia faamauina lou finagalo i ni taifau foi lea, e le gata i taifau e maua mai ai ia aisa ma laau faasaina ae o ni taifau foi lea e mafai ona latou maua mai pe a iai ni pomu po o ni auupega. Ia faamauina le fautuaga. Sa e fesiligia foi ona ua lima tausaga po o le a le mea ua tupu i le faila a Opetaia Chong Nee ia lau Afioga o lo o tatala foi le faila a Leoleo i le Mataupu lea e le i tapunia talu ona e aluese ma le Matagaluega ae e sau e te Faipule. Ia o lea la e sue poo fea o iai Opetaia a o le mea mautinoa a e lei toe maua se faailoga foi lea i se talepe fale ae maua mai ai finger prints o Opetaia. O lona uiga la o Opetaia tatou te leiloa po o fea o iai ae le o maua foi i faamaumauga ma suesuega a Leoleo o iai i le tulaga foi lea solitulafono o le talepe fale aua pei e tasi lea tulaga sa tele ina loka ai ia Opetaia.

Ia mulimuli la se faamatalaga Lau Afioga i le Fofoga Fetalai i fualaau faasaina, faamauina ia finagalo uma a o le Maota tatou te popole uma a i aafiaga o le mea lenei o fualaau faasaina aemaise a le aisa. Ia ua faatupulaia foi ia le aofia o e o lo o maua i le tulaga lea i mea tau aisa. Lau Afioga i le Fofoga Fetalai o faamaumauga a le matagaluega mai le tausaga e 2018 e lua osofaiga a Leoleo na maua ai ia aisa i osofaiga ia. I le 2019 e tolu, 2020 e tolu, 2021 e lima, 2022 e valu, 2023 e lima, e luasefulu ono le aofai ma o la foi e iai le tulaga lea e siisii laititi foi a i luga i lea tausaga i lea tausaga ia le aisa. E popole i fuainumera lau Afuoga ae o le tala fiafia ia au i lau tilotilo i le mea lea o la e sao le faatinoga o le suesuega a Leoleo ona o taimi uma a lea na o ai Leoleo e raid na maua mai ai ia aisa. O lea la e lelei le faatinoina e Leoleo o le auauanga, ua ae uau a le tulaga foi lea tatou te mananao e titina aua nei salalau faafamai lenei soligatulafono. Ona o lona aafiaga lea, o le tele o le tupe e maua ai o le mea foi lea o lea ua manao ai a le tagata ia e tufa le aisa ma faaaoga le aisa ona o le tupe ua malie foi a e alu i le falepuipui. Sa faaali foi le manatu foi lea poo la e gaosi i totonu o Samoa le aisa ia o le fautuaga lea e aumai e le matagaluega ia te au, o le latou talitonuga, e leai. E faavae la le latou talitonuga i le tulaga foi lea o le aofai o le codeine, e te manaomia le codeine e fai ai le aisa, o le aofai o fualaau ia e te manaomia o la e o latou siaki ia fualaau la e ave i le Falemai ma fualaau lea e ave i Faletalavai lea talavai ai tatou ia faapea foi ia fualaau ia i faleoloa laiti. E le o matauina se tulaga foi lea, se tele o se aofai o aumai ae le o se tagata lea e tatau ona iai ni fualaau faapea. Ia o le fautuaga lena ae matauina le finagalo ia taumafai pea le matagaluega ia aua nei oo i se tulaga ua gaosi i totonu i inei ia le aisa. A faapea foi e gaosi i inei ia maua la ia tagata ia o le a faia ia le tulaga lea.

E faamauina foi finagalo ia na faaalia i auala, e popoto foi le au solitulafono e faaaoga ia toothpaste o....

FOFOGA FETALAI: Ia ou te vaelupeina le saunoaga a lau Afioga i le Minisita talitonu foi o lea ua oo tonu a lau saunoaga i nisi foi o mataupu sa lagalaga e le tele o Sui. Ia e talitonu foi o le a faamaea lau saunoaga pe a tatou taliu mai le tatou malologa.

Na faataatiaese Taualumaga a le Fono Aoao Faitulafono i le itula e 1:00 i le afiafi.